

隱  
元  
六年  
至

□ 12  
3032  
1





門 口 12  
號 3032  
卷 1

口 12  
3032  
1-8

文文起先生鑒定

# 春秋四傳

貽經堂藏版

650





春秋四傳序

昔者夫子因魯史作春秋以定君臣  
父子之極而褒貶意義不可具書皆  
口授弟子以傳傳者各異其說左丘  
明恐失其真因經立傳于是有素王  
素臣之目焉其授端木氏者傳于公





羊高高子平平子地地子敢敢子壽  
度秦至漢壽乃共弟子胡毋子都筆  
于書而卜氏春秋傳于穀梁元始名  
赤亦名淑以授孫卿至蔡千秋顯于  
漢宣之世此三傳所繇作也漢承秦  
焚書滅學之後益務經術儒者守其

師說沒世不遷說公羊者胡毋生後  
爲東平嬴公東海孟卿魯人眭孟東  
海嚴彭祖魯人顏安樂而嚴氏之傳  
最盛膠西相董仲舒尤精其業漢末  
何休集衆說爲解而排兩家有穀梁  
膏肓左氏廢疾等書此公羊傳之始



末也孫卿後爲瑕丘江公魯人榮廣  
王孫皓星公及千秋以善穀梁擢諫  
大夫甘露中詔五經名儒蕭望之等  
大議殿中平公羊穀梁同異各以經  
處是非議郎尹更始王亥以穀梁對  
上多從其義而穀梁之學大盛至晉

范甯爲集解此穀梁傳之始末也左  
氏最先成而行獨後修其業者漢北  
平侯張蒼太傅賈誼誼爲訓詁授趙  
人貫公後亦無傳京兆尹雋不疑張  
敞大中大夫劉公子皆通其義其後  
劉歆典較經籍考而正之欲立于學



宮諸儒莫應建武中尚書令韓歆請立而未行陳元明訟之而終罷暨永平中始擢通左氏者高第拜講郎服虔賈逵並爲訓解當陽侯杜預爲之注而左氏之學至今爲烈此左氏傳之始末也唐宋以來專門之儒不可

勝數若啖助陸贄孫復許翰陸佃祖無擇等尤爲卓爾而撰述無聞至胡文定公安國覃思三十年著傳進講今爲

明時功令此胡氏傳之始末也蓋從來言春秋者以謂辨是非定邪正爲



禮義之大宗至于爲人君爲人父爲  
人臣子守經遭變俱不可以不知春  
秋其功用宏遠矣自漢以後習讀之  
者往往採春華而忘秋實柳河東名  
世文人亦惟曰本之公羊以求其斷  
參之穀梁以厲其氣韓昌黎直云左

氏浮夸而已至文定之說進于南渡  
偏安之日每以復仇雪恥附會于華  
夷之防昭君父之義中亦不能無牽  
合穿鑿之病焉所以大行于  
聖世者其指顯其文達其論議多不  
悖于古而近于時然今之學者亦徒



春利四傳序  
用以梯進取媒利祿耳誰能體諸實  
用以見施行況于三傳又況于夫子  
筆削之微指哉故經術之不尊未有  
甚于昭代者也經術不尊而文章政  
事日趨苟且進而人品進而心術益  
卑益弱愈晦愈蒙又何怪乎新安汪

君馳聲秬苑刻四傳成因題其端發  
明始末而昭其意義使考傳窮經者  
有所徵焉有能研精經術明皇王之  
道析事物之紀崇聖學敦行誼一洗  
曲學阿世之恥以彰撥亂反正之功  
斯則春秋之光而習讀四氏之書者



信有樂乎玄杓此刻者矣

左春坊左諭德兼翰林院侍講掌司

經局事文震孟撰



春秋四傳總目

胡傳序

左傳序

公羊傳序

穀梁傳序

程傳序

綱領

提要

東坡地理圖說 增

大明輿圖



諸國年表

諸國興廢說

第一卷

隱公一

元年之二年

第二卷

隱公二

三年之五年

第三卷

隱公三

七年之十一年

第四卷

桓公一

元年之四年

第五卷

桓公二

五年之十年

第六卷



桓公三

十一年之十八年

第七卷

莊公一

元年之七年

第八卷

莊公二

八年之十四年

第九卷

莊公三

十五年之二十三年

第十卷

莊公四

二十四年之二十五年

第十一卷

閔公

元年之二年

第十二卷



僖公一

元年之五年

第十三卷

僖公二

六年之十五年

第十四卷

僖公三

十六年之二十四年

第十五卷

僖公四

二十五年之二十八年

第十六卷

僖公五

二十九年之三十二年

第十七卷

文公一

元年之八年

第十八卷



文公二

九年之十八年

第十九卷

宣公一

元年之六年

第二十卷

宣公二

七年之十二年

第二十一卷

宣公三

十二年之十八年

第二十二卷

成公一

元年之五年

第二十三卷

成公二

六年之十年

第二十四卷



成公三

十一年之十八年

第二十五卷

襄公一

元年之九年

第二十六卷

襄公二

十年之十八年

第二十七卷

襄公三

十九年之二十六年

第二十八卷

襄公四

二十七年之三十二年

第二十九卷

昭公一

元年之六年

第三十卷



昭公二

七年之十三年

第三十一卷

昭公三

十四年之二十一年

第三十二卷

昭公四

二十二年之二十五年

第三十三卷

昭公五

二十六年之三十二年

第三十四卷

定公一

元年之七年

第三十五卷

定公二

八年之十五年

第三十六卷



哀公一卷

元年之七年

第三十七卷

哀公二卷

八年之十四年

第三十八卷

附錄左傳

哀公三卷 六年之二十二年

十四年之二十七年

春秋總目 終

春秋胡傳序

胡氏傳序

古者列國各有史官掌記時事。春秋魯史爾。仲尼就加筆削。乃史外傳。心之要典也。而孟氏發明宗旨。目為天子之事者。周道衰微。乾綱解紐。亂臣賊子接迹當世。人欲肆而天理滅矣。仲尼天理之所在。不以為己任。而誰可。五典弗惇。已所當叙。五禮弗庸。已所當秩。五服弗章。已所當命。五刑弗用。已所當討。故曰文王既沒。文不在



春秋四傳 序  
茲乎。天之將喪斯文也。後死者不得與於斯文也。天之未喪斯文也。匡人其如予何。聖人以天自處。斯文之興喪在已。而由人乎哉。故曰我欲載之。空言。不如見諸行事之深切著明也。空言獨能載其理。行事然後見其用。是故假魯史以寓王法。撥亂世反之正。叙先後之倫。而典自此可惇。秩上下之分。而禮自此可庸。有德者必褒。而善自此可勸。有罪者必貶。而惡自此可懲。其志存乎經世。其功配於抑洪水。膺戎狄。放龍蛇。

驅虎豹。其大要則皆天子之事也。故曰知我者其惟春秋乎。罪我者其惟春秋乎。知孔子者謂此書之作。遏人欲於橫流。存天理於既滅。爲後世慮至深遠也。罪孔子者謂無其位而託二百四十二年南面之權。使亂臣賊子禁其欲而不得肆則戚矣。是故春秋見諸行事。非空言比也。公好惡則發乎詩之情。酌古今則貫乎書之事。興常典則體乎禮之經。本忠恕則導乎樂之和。著權制則盡乎易之變。百王之法度。萬世之準。



繩皆在此書。故君子以謂五經之有春秋。猶法律之有斷例也。學是經者。信窮理之要矣。不學是經。而處大事。決大疑。能不惑者鮮矣。自先聖門人。以文學各科。如游夏。尚不能贊一辭。蓋立義之精如此。去聖既遠。欲因遺經。窺測聖人之用。豈易能乎。然世有先後。人心之所同然。一爾。苟得其所同然者。雖越宇宙。若見聖人親炙之也。而春秋之權度在我矣。近世推隆王氏新說。按爲國是。獨於春秋貢舉。不以取士。庠序不以

設官。經筵不以進讀。斷國論者無所折衷。天下不知所適。人欲日長。天理日消。其効使夷狄亂華。莫之遏也。噫。至此極矣。仲尼親手筆削撥亂反正之書。亦可以行矣。天縱聖學。崇信是經。乃於斯時奉承詔旨。輒不自揆。謹述所聞爲之說。以獻。雖微辭奧義。或未貫通。然尊君父。討亂賊。闢邪說。正人心。用夏變夷。大法略具。庶幾聖王經世之志。小有補云。

**音註**

胡安國。按宋鑑。胡安國。崇安人。紹聖中進士。擢太學博士。靖康初。除太常少卿。







春秋左傳卷之四  
公之德與周之所以王韓子所見蓋周之舊典  
禮經也周德既衰官失其守上之人不能使春  
秋昭明赴告策書諸所記注多違舊章仲尼因  
魯史策書成文考其真僞而制其典禮上以遵  
周公之遺制下以明將來之法其教之所存文  
之所害則刊而正之以示勸戒其餘則皆卽用  
舊史史有文質辭有詳略不必改也故傳曰其  
善志又曰非聖人孰能脩之蓋周公之志仲尼  
從而明之左丘明受經於仲尼以爲經者不刊

之書也故傳或先經以始事或後經以終義或  
依經以辯理或錯經以合異隨義而發其例之  
所重舊史遺文略不盡舉非聖人所修之要故  
也身爲國史躬覽載籍必廣記而備言之其文  
緩其旨遠將令學者原始要終尋其枝葉究其  
所窮優而柔之使自求之饜而飫之使自趨之  
若江海之浸膏澤之潤渙然冰釋怡然理順然  
後爲得也其發凡以言例皆經國之常制周公  
之垂法史書之舊章仲尼從而脩之以成一經



之通體。其微顯闡幽。裁成義類者。皆據舊例而發義。指行事以正褒貶。諸稱書不書。先書故書不言。不稱書曰之類。皆所以起新舊發大義。謂之變例。然亦有史所不書。卽以爲義者。此蓋春秋新意。故傳不言。凡曲而暢之也。其經無義例。因行事而言。則傳直言其歸趣而已。非例也。故發傳之體有三。而爲例之情有五。一曰微而顯。文見於此而起義在彼。稱族尊君命。舍族尊夫人。梁亡城緣陵之類是也。二曰志而悔。約言示

制。推以知例。參會不地。與謀曰及之類是也。三曰婉而成章。曲從義訓。以示大順。諸所諱辟。壁假許田之類是也。四曰盡而不汙。直書其事。具文見意。丹楹刻桷。天王求車。齊侯獻捷之類是也。五曰懲惡而勸善。求名而亡。欲蓋而章。書齊豹盜。三叛人名之類是也。推此五體以尋經傳。觸類而長之。附于二百四十二年行事。王道之正。人倫之紀備矣。或曰春秋以錯文見義。若始所論。則經當有事同文異。而無其義也。先儒所



傳皆不其然。答曰：春秋雖以一字爲褒貶，然皆須數句以成言。非如八卦之爻，可錯綜爲六十四也。固當依傳以爲斷。古今言左氏春秋者多矣。今其遺文可見者十數家。大體轉相祖述，進不得爲錯綜經文以盡其變，退不守丘明之傳。於丘明之傳有所不通，皆沒而不說，而更庸引公羊穀梁適足自亂。預今所以爲異，專脩丘明之傳以釋經，經之條貫必出於傳，傳之義類總歸諸凡，推變例以正褒貶，簡二傳而去異端，蓋

丘明之志也。其有疑錯，則備論而闕之，以俟後賢。然劉子駿創通大義，賈景伯父子，許惠卿皆先儒之美者也。未有穎子嚴者，雖淺近亦復名家。故特舉劉賈許穎之違，以見同異分經之年。與傳之年相附比其義類，各隨而解之名曰經傳集解。又別集諸例及地名譜第歷數相與爲部，凡四十步十五卷，皆顯其異同，從而釋之。名曰釋例。將令學者觀其所聚異同之說，釋例詳之也。或曰春秋之作，左傳及穀梁無明文說者



以爲仲尼自衛反魯。脩春秋。立素王。丘明爲素臣。言公羊者。亦云黜周而王魯。危行言孫。以辟當時之害。故微其文。隱其義。公羊經止獲麟。而左氏經終孔丘卒。敢問所安。答曰。異乎余所聞。仲尼曰。文王旣沒。文不在茲乎。此制作之本意也。歎曰。鳳鳥不至。河不出圖。吾已矣夫。蓋傷時王之政也。麟。鳳。五靈。王者之嘉瑞也。今麟出非其時。虛其應。而失其歸。此聖人所以爲感也。絕筆於獲麟之一句者。所感而起。固所以爲終也。

曰。然則春秋何始於魯。隱公。答曰。周平王東周之始王也。隱公讓國之賢君也。考乎其時。則相接。言乎其位。則列國本乎其始。則周公之祚胤也。若平王能祈天永命。紹開中興。隱公能強宣祖業。光啓王室。則西周之美可尋。文武之迹不隊。是故因其歷數。附其行事。采周之舊。以會成王義。垂法將來。所書之王。卽平王也。所用之歷。卽周正也。所稱之公。卽魯隱也。安在其黜周而王魯乎。子曰。如有用我者。我其爲東周乎。此其



義也。若夫制作之文，所以章往考來，情見乎辭。言高則旨遠，辭約則義微。此理之常，非隱之也。聖人包周身之防，既作之後，方復隱諱以辟患。非所聞也。子路欲使門人為臣，孔子以為欺天。而云仲尼素王，丘明素臣，又非通論也。先儒以為制作二年，文成致麟，既已妖妄，又引經以至仲尼卒，亦又近誣。據公羊經止獲麟，而左氏小邾射不在三叛之數，故余以為感麟而作，作起獲麟，則文止於所起，為得其實。至於反袂拭面。

稱吾道窮，亦無取焉。

**音註**

杜預按晉書杜預字元凱杜陵人畿孫博學時號杜武庫武帝時為河南尹荆州都督羊祜舉預自代拜征南將軍以平吳功封當陽侯嘗作春秋左傳集解







氏可興。恨先師觀聽不決。多隨二創。此世之餘事。斯豈非守文持論。敗績失據之過哉。余竊悲之久矣。往者略依胡母生條例。多得其正。故遂隱括。使就繩墨焉。

**音註**

何休按漢書何休字昭公任城樊人質朴呐口而雅有心思精研六經世儒無及者常作公羊墨守左氏膏肓穀梁廢疾除北新城長大作講舍聚生徒數百朝夕自往觀講儒化大行賈逵按漢書賈逵字景伯平陵人父徽受左氏春秋兼習國語周官尚書毛詩逵悉傳其業尤憫儻有大節明帝時拜爲侍中至和帝時內備帷幄兼領秘書甚見信用所著經傳義話反論難百餘萬言學者宗之稱爲通儒

穀梁傳序

范甯著

昔周道衰陵。乾綱絕紐。禮壞樂崩。彝倫攸斁。弑逆篡盜者。國有淫縱。破義者。比肩。是以妖災因釁而作。民俗染化而遷。陰陽爲之愆度。七曜爲之盈縮。川岳爲之崩竭。鬼神爲之疵癘。故父子之恩缺。則小弁之刺作。君臣之禮廢。則桑扈之諷興。夫婦之道絕。則谷風之篇奏。骨肉之親離。則角弓之怨彰。君子之路塞。則白駒之詩賦。天垂象。見吉凶。聖作訓。紀成敗。欲人君戒慎厥行。



增脩德政。蓋誨爾諄諄。聽我藐藐。履霜堅冰。所  
由者漸。四夷交侵。華戎同貫。幽王以暴虐見禍。  
平王以微弱東遷。征伐不由天子之命。號令出  
自權臣之門。故兩觀表而臣禮亡。朱于設而君  
權喪。下陵上替。僭迫理極。天下蕩蕩。王道盡矣。  
孔子觀滄海之橫流。迺喟然而歎曰。文王既沒。  
文不在茲乎。言文王之道喪。興之者在已。於是  
就大師而正雅頌。因魯史而備春秋。列黍離於  
國風。齊王德於邦君。所以明其不能復雅。政化

不足以被群后也。於是則接乎隱公。故因茲以  
託始。該二儀之化育。贊人道之幽變。舉得失以  
彰黜陟。明成敗以著勸誡。拯頹綱以繼三五。鼓  
芳風以扇遊塵。一字之褒。寵踰華袞之贈。片言  
之貶。辱過市朝之撻。德之所助。雖賤必申。義之  
所抑。雖貴必屈。故附勢匿非者。無所逃其罪。潛  
德獨運者。無所隱其名。信不易之宏軌。百王之  
通典也。先王之道。既弘。麟感化而來應。因事備  
而終篇。故絕筆於斯年。成天下之事業。定天下



之邪正莫善於春秋。春秋之傳有三。而爲經之旨一。臧否不同。褒貶殊致。蓋九流分而微言隱。異端作而大義乖。左氏以鬻拳兵諫爲愛君。文公納幣爲用禮。穀梁以衛輒拒父爲尊祖。不納子糾爲內惡。公羊以祭仲廢君爲行權。妾母稱夫人爲合正。以兵諫爲愛君。是人主可得而脇也。以納幣爲用禮。是居喪可得而婚也。以拒父爲尊祖。是爲子可得而叛也。以不納子糾爲內惡。是仇讎可得而容也。以廢君爲行權。是神器

可得而窺也。以妾母爲夫人。是嫡庶可得而齊也。若此之類。傷教害義。不可得彊通者也。凡傳以通經爲主。經以必當爲理。夫至當無二。而三傳殊說。庸得不棄其所滯。擇善而從乎。旣不俱當。則固容俱失。若至言幽絕。擇善靡從。庸得不竝舍以求宗。據理以通經乎。雖我之所是。理未全當。安可以得當之難。而自絕於希通哉。而漢興以來。環望碩儒。各信所習。是非紛錯。準裁靡定。故有父子異同之論。石渠分爭之說。廢興由



於好惡盛衰繼之辯訥。斯蓋非通方之至理。誠君子之所歎息也。左氏豔而富。其失也誣。穀梁清而婉。其失也短。公羊辯而裁。其失也俗。若能富而不誣。清而不知。裁而不俗。則深於其道者也。故君子之於春秋。沒身而已矣。升平之末。歲次大梁。先君北蕃。迴軫頓駕於吳。乃帥門生故吏。我兄弟子姪。研講六籍。次及三傳。左氏則有服杜之註。公羊則有何嚴之訓。釋穀梁傳者。雖近十家。皆膚淺末學。不經師匠。辭理典據。既無

可觀。又引左氏公羊以解此傳。文義違反。斯害也已。於是乃商略名例。數陳疑滯。博示諸儒。同異之說。昊天不弔。泰山其頽。匍匐墓次。死亡無日。日月逾邁。跋及視息。乃與二三學士及諸子弟。各記所識。并言其意。業未及終。嚴霜夏墜。從弟彫落。二子泯沒。天實喪予。何痛如之。今撰諸子之言。各記其姓名。名曰春秋穀梁集解。

音註

范甯按晉書。范甯字武子。鄆陵人。少博學。多所通覽。時稱儒雅。咸安初。拜中書侍郎。孝武帝雅好文學。甚被親愛。凡朝廷疑議。輒諮訪之。既而出。補豫章太守。大設庠序。



遣人往交州採磬石以供學用。遠近至者千餘人。資給衆費。一出私祿。又起學臺。功用彌廣。後爲刺史。王疑之。彈劾免官。

穀梁傳序

終

附錄 程子傳序

天之生民。必有出類之才。起而君長之。治之而爭奪息。道之而生養遂。教之而論理明。然後人道立。天道成。地道平。二帝而上。聖賢世出。隨時有作。順乎風氣之宜。不先天以開人。各因時而立政。暨乎三王迭興。三重既備。子丑寅之建正。忠質文之更尚。人道備矣。天道周矣。聖王既不復作。有天下者。雖欲倣古之迹。亦私意妄爲而已。事之繆。秦以建亥爲正道之悖。漢專以智力



春秋四傳  
序  
持世豈復知先王之道也。夫子當周之末。以聖人之不復作也。順天應時之治。不復有也。於是作春秋。爲百王不易之大法。所謂考諸三王而不謬。建諸天地而不悖。質諸鬼神而無疑。百世以俟聖人而不惑者矣。先儒之論曰。游夏不能贊一辭。辭不待贊也。言不能與於斯耳。斯道也。惟顏子嘗聞之矣。行夏之時。乘殷之輅。服周之冕。樂則韶舞。此其準的也。後世以史視春秋。謂褒善貶惡而已。至于經世之大法。則不知也。春

秋大義數十。其義雖大。炳如日星。乃易見也。惟其微辭隱義。時措從宜者。爲難知也。或抑或縱。或與或奪。或進或退。或微或顯。而得乎義理之安。文質之中。寬猛之宜。是非之公。乃制事之權衡。揆道之模範也。夫觀百物而後識化工之神。聚衆材而後知作室之用。於一事一義而欲窺聖人之用心。非上智不能也。故學春秋者。必優游涵泳。默識心通。然後能造其微也。後王知春秋之義。則雖德非禹湯。尚可以法三代之治。自



秦而下。其學不傳。予悼夫聖人之志不得明於後世也。故作傳以明之。俾後之人通其文而求其義。得其意而法其用。則三代亦可復也。是傳也。雖未能極聖人之蘊奧。庶幾學者得其門而入矣。有宋崇寧二年癸未。四月乙亥。河南程頤正叔序。

**音註**

程頤按宋鑑程頤字正叔河南人珣之子少有高識非禮不動仁宗時上疏欲黜世俗之論以王道為心大臣屢薦不起哲宗初詔授西京國子教授力辭召見擢崇政殿說書文彥博稱為真侍講後入元祐黨籍頤與兄顥倡明道學出其門者最多世稱伊

川先生後諡正公封伊陽伯從祀孔子廟庭



春秋列國東坡圖說

傳稱武王克商。光有天下。兄弟之國者十有五人。姬姓之國者四十人。爵五品而土三等。公侯百里。伯七十里。子男五十里。不滿為附庸。蓋千八百國。周室既衰。轉相吞滅。數百年間。列國耗盡。春秋之世。見於經傳者總一百


二十四國

魯 晉 楚 齊 秦 吳 越 宋 衛 鄭 陳 蔡 邾 郕 鄆 郕 徐 郕 芮 胡 南 燕 州 梁 荀 賈 凡 祭 宿 鄆 原 夔 舒 鳩 滑 郟 黃 羅 邢 魏 霍 郟 鄭 瞞 向 偃 陽 韓 舒 庸 焦 楊 夷 申 密 耿 麋 萊 莒 弦 賴 沈 穀 譚 舒 邲 白 狄 賴 肥 鼓 戎 蠻 唐 潞 江 郟 權 道 桓 貳









前圖業已悉矣然讀經者非止為學究計  
 直須得其實用之所在矧麟經法戒犂然  
 不設身處地則無以晰一時興亡之端不  
 移古印今則無以儲用世安攘之畧蓋陵  
 谷滄桑隨時遞易如春秋秦楚則夷之今  
 盡衣冠望國何以陶淑於雅化如春秋各  
 自為藩籬今則六合一區何以消萌於未  
 雨所貴妙其用而不盭其意神而明之存  
 乎人也故復列我 明輿圖詳悉于左







此我明輿圖也其邊陲州郡間亦已見于前圖但彼畧而此詳彼未免與古牽合而此則顛臚一今繇是知險易而防禦有方知肥磽而摘循有畧知剛柔燥濕而經畫井井有條理春秋安攘大旨一任展措矣嗟嗟哀隅發難遼左沈淪懷請纓之志者不得迂麟經無韜畧也則亦叅究于斯圖云

新安汪應魁玄杓甫識

春秋四傳綱領

胡氏曰學春秋者必知綱領然後衆目有條而不紊自孟軻氏而下發明綱領者凡七家今載七家精要之詞于卷首智者卽詞以觀義則思過半矣

孟軻氏曰春秋天子之事也昔者禹抑洪水而天下平周公膺戎狄驅猛獸而百姓寧孔子成春秋而亂臣賊子懼又曰王者之迹熄而詩亡詩亡然後春秋作晉之乘楚之檮杌魯



之春秋一也。其事則齊桓晉文。其文則史。其義則丘竊取之矣。又曰。春秋無義戰。彼善於此。則有之矣。征者上伐下也。敵國不相征也。

**音註**

孟軻按一統志。孟軻字子車。戰國時騶人。受業于思之門。道既通。游齊梁。以仁義說其君。不能用。退與萬章之徒。序詩書。述仲尼之意。作孟子七篇。後世累封鄒國亞聖公。配孔子廟庭。

莊周曰。春秋經世。先王之志也。聖人議而不辨。又曰。春秋以道名分。

**音註**

莊周按史記。莊周戰國蒙人。嘗為蒙漆園吏。其學無所不闚。楚威王聞其賢。遣

使厚幣迎之。周曰。千金重利。卿相尊位也。子獨不見犧牛乎。我寧遊戲以快吾志焉。著書十餘萬言。汪洋自恣。雖當世宿學。不能自解免也。

**漢**董仲舒記夫子之言曰。我欲載之空言。不如見之於行事之深切著明也。誦其師說曰。撥亂世反之正。莫近春秋。其自言曰。有國者不可以不知春秋。前有讒而不見。後有賊而不知。為人臣者不可以不知春秋。守經事而不知其宜。遭變事而不知其權。為人君父而不知其宜。遭變事而不知其權。為人臣子而通春秋之義者。必蒙首惡之名。為人臣子而



不通春秋之義者必陷篡弑之罪。故春秋禮義之大宗也。

**音註**

董仲舒按漢書董仲舒廣川人少治春秋。下帷講授三年不窺園圃以賢良對策勸武帝勉強學問行道設誠于內等語。帝嘉之以為江都相。仲舒學有源委。正誼明道之言。度越諸子。為漢醇儒。

**隋**王通曰春秋之於王道是輕重之權衡。曲直之繩墨也。舍則無所取衷矣。又曰春秋其以天道終乎。故止於獲麟。

**音註**

王通按隋書王通字仲淹龍門人少好學慨然有濟蒼生之志。詣長安奏太平

十二策不見用。退居河汾。教授。做古作經。又為中說以擬論語大業。初徵不至。及卒。門人諡曰文中子。

**宋**西都邵雍曰春秋孔子之刑書也。功過不相掩。五伯者功之首。罪之魁也。先定五伯之功。過而學春秋則大意立矣。春秋之間有功者。未有大於四國者也。有過者亦未有大於四國者。也不先治四國之功。過則事無統理。不得聖人之心矣。

**音註**

邵雍按宋鑑邵雍字堯夫其先范陽人。雍游河南。因葬其親伊水上。遂家焉。受



學李之才。探頤索隱。遂衍先天之旨。尤精數  
學。著書十餘萬言。富弼。司馬光。呂公著。二程  
子。雅敬雍。為市園宅。自名其居曰安樂窩。春  
秋時乘小車出遊城中。賢者悅其德。不肖者  
服其化。舉遺士。補穎川團  
練推官。不就卒。諡康節。

橫渠張載曰。春秋之書。在古無有。乃仲尼所目

作。惟孟子為能知之。非理明義精。殆未可學。

先儒未及此而治之。故其說多鑿。

**音註**

張載按宋鑑。張載字子厚。郿人。舉進士。  
為祁州司法。歷渭川簽判。召為崇文殿  
校書。同知太常禮院。為人志氣不群。初喜談  
兵。及釋老書。反而求之。六經既見。二程子盡  
棄異學。而學焉。神宗立。召問治道。首以復三  
代為對。與執政不合。告歸。居橫渠。鎮日危坐。

一室。潛心精思。教人以禮。關西之士。翕然宗  
之。所著有東銘。西銘。正蒙。擴聖賢所未發。卒。  
諡曰明。淳祐初。封郕  
伯。從祀孔子廟庭。

河南程頤曰。五經載道之文。春秋聖人之用。五

經之有春秋。猶法律之有斷例也。又曰。五經

如藥方。春秋猶用藥治病。聖人之用。全在此

書。又曰。春秋一句。即一事。是非便見於此。乃

窮理之要。學者只觀春秋。亦可以盡道矣。又

曰。春秋傳為按經為斷。又曰。春秋之文。一一

意在示人。如土功之事。無大小。莫不書之。其



意止欲人君重民力也。又曰。春秋之法極謹嚴。中國而用夷禮則夷之。韓子之言深得其

旨

**音註**

韓愈按唐鑑。韓愈字退之。南陽人。即今脩武縣北。南陽城是也。七歲讀書。日記數千言。比長。盡通六經百家之學。擢進士第。累官刑部侍郎。時憲宗迎佛骨。愈上表極諫。貶潮州刺史。除鱷魚患。尋改袁州。召拜國子祭酒。歷轉吏部侍郎。卒。贈禮部尚書。諡曰文。愈為文粹然。一出于正。佐佑六經。學者仰之。如泰山北斗云。

春秋四傳綱領 畢

春秋提要

○周十二王 春秋歷十有四王。悼王立未踰年。敬王崩在春秋後。故止曰十

王二

平王 四十九年入春秋。隱元年也。三年崩。在位五十二年。

桓王 元年隱四年也。桓十五年崩。在位二十三年。

莊王 元年桓十六年也。莊十二年崩。在位十五年。

僖王 元年莊十三年也。僖七年崩。在位五年。

惠王 元年莊十八年也。僖八年崩。在位二十五年。

襄王 元年僖九年也。文八年崩。在位三十三年。



頃王

元四年崩在位六年

匡王

元二年崩在位六年

定王

元三年崩在位二十一年

簡王

元六年崩在位十四年

靈王

元二年崩在位二十八年

景王

元十二年崩在位二十五年

敬王

元也崩在春秋後二十三年

○列國見於年表者十九

魯蔡曹衛滕晉鄭齊秦楚宋杞陳吳邾莒薛

許小邾

○魯十二公

隱公

不書即位

桓公

四年七年去秋冬二時

莊公

不書即位

閔公

不書即位

僖公

不書即位

文公

宣公

成公

襄公

昭公

定公

元年無正月

哀公

○五伯

春秋終入吳黃池之役吳越亦爭伯矣



齊桓公

莊十三年會北杏

宋襄公

晉文公

僖二十八年戰城濮

秦穆公

文三年伐晉

楚莊王

宣十一年盟辰陵

○晉十一世

文公

僖二十八年立  
三十二年卒

襄公

僖三十三年立  
文六年卒

靈公

文七年立  
宣二年卒

成公

宣三年立  
宣九年卒

景公

宣九年冬立  
成十年卒

厲公

成十一年立  
十八年卒

悼公

成十八年立  
襄十五年卒

平公

襄十六年立  
昭十年卒

昭公

昭十一年立  
十六年卒

頃公

昭十七年立  
三十年卒

定公

昭三十年立  
卒在春秋後

○魯三桓

仲孫氏

又曰孟孫

叔孫氏

季孫氏

○晉八卿

知瑩

士匄

荀偃

韓起

欒黶

士魴

魏絳

趙武



○晉六卿

趙氏

范氏

智氏

荀氏

魏氏

韓氏

○晉三卿

魏斯

韓虔

趙籍

○周來聘七

隱七年九伯

九年南季

桓四年宰渠伯糾糾 五年仍叔之子

八年家父 僖三十年宰周公

宣十年王季子

○周錫命三

莊元年榮叔木金 文元年毛伯

成八年召伯 文元年宋父宋車

○周歸賑一

定十四年石尚

○周贈葬四



隱元年宰咺

文元年叔服

五年榮叔召伯

○周來求三

隱三年武氏子求賻

桓十五年家父求車

文九年毛伯求金

文九年平手

○魯君臣朝聘于周八

文九年叔孫得臣二十二年叔鞅會葬故

宣十不王季子

僖二十八年公兩朝王所

三十辛風公

成十三年公如京師

僖三十年公子遂

文元年叔孫得臣

八年公孫敖

宣九年仲孫蔑

襄二十四年叔孫豹

○公如齊十有一

春秋公如齊者十有五桓莊四如皆非朝故不數

僖公三

宣公六

昭公二

昭公二十

○公如晉二十

國事而於

文公二

夫鄆取圖五十成公四

昭公二昭公四

襄公五

昭公八

定公一



○公如楚二

襄公一

昭公一

○魯大夫聘列國五十有六

又齊四如宋王如晉二如陳

○公滕各一皆因事而往非專行聘禮故不數

如齊十有九

如晉二十有五

如陳二

如宋五

如牟如衛如楚如莒如邾各一

○諸國朝魯四十

曹滕小邾各五

杞邾各七

邾一

薛紀穀鄧郟郚葛牟蕭各一

○齊聘魯五

隱七年弟年

桓三年弟年

僖三十三年國歸父

宣十年國佐

襄二十七年慶封

○晉聘魯十有一

成三年荀寅

八年士燮

十一年卻犢

十八年士匄



襄元年荀瑩

八年士句

十二年士魴

二十六年荀吳

二十九年士鞅

昭二年韓起

昭二十一年士鞅

○宋聘魯四

宣十四年

成四年華元

八年華元

襄十五年向戌

昭十二年華定

○衛聘魯四

宣十四年

文四年甯俞

成三年孫良夫

襄元年公孫剽

襄七年孫林父

○陳鄭秦吳聘魯各一

莊二十五年陳女叔

文十二年秦術

襄五年鄭公子發

襄二十九年吳札

○楚聘魯三

宣十四年

莊二十三年荆人

文九年椒

襄三十年蘧罷

○盟一百有九

凡盟會侵伐內為主書及外為主書會所以別首從而謹

善惡之首也



始隱元年蔑

終哀二年句繹

○特盟參盟同盟始終

石門于鹹特盟之始終也

瓦屋郵陵參盟之始終也

于幽平丘同盟之始終也

○同盟十有六齊盟二皆同尊周也晉盟十有四皆同外楚也

兩幽齊桓秦吳鄭魯各一新城晉靈

清丘平公濟隈斷道平公濟隈

垂牢平公濟隈馬陵平公濟隈

于蒲晉景于戚

柯陵晉厲虛朶

鷄澤平公濟隈于戲

亳城北晉悼重丘晉平

平丘晉昭

○殊盟二

僖五年首止晉昭僖九年葵丘晉昭

○涖盟四晉昭



僖三年公子友如齊 文七年公孫敖如莒

昭七年叔孫婁如齊 定十一年叔還如鄭

○來盟五

桓十四年鄭弟語 閔二年齊高子

僖四年楚屈完

文十五年宋司馬華孫

宣七年衛孫良夫

○外大夫聘而遂盟五

成三年荀庚良夫 十一年郟蠻

襄七年林父 十五年向戌

○會九十七

始隱二年潛

終哀十三年黃池

○殊會四

僖五年首止 成十五年鍾離

襄十年于祖 襄十四年于向

○遇七

志內之遇者四而皆書及若曰以此及彼然也志外之遇者三而皆以爵

若曰以尊及卑然也



隱四年遇清

莊二十三年遇穀

三十年遇魯濟

僖十四年遇防

隱八年宋衛遇垂

莊四年齊陳鄭遇垂

三十二年宋齊遇梁丘

○平五

加宣四年平  
莒及郟為立

隱六年鄭來輸平

宣十五年宋及楚平

昭七年暨齊平

定十年及齊平

定十一年及鄭平

○來七

隱元年祭伯來

六年寔來

八年祭公來

僖二十九年兩介葛盧來

襄十八年白狄來

○人自為盟三

桓十一年惡曹

中國未有伯  
而人自為盟

僖二十一年鹿上

中國於無伯  
而人自為盟

宣十二年清丘

中國又將無伯  
而人自為盟

○侵六十

潛師掠  
境曰侵



始莊十年公侵宋

終哀十三年晉魏曼多衛

○伐二百十有三

聲罪致討曰伐

始隱二年鄭人伐衛

終哀十三年楚公子甲伐陳

○戰二十三

兩兵相接曰戰書敗績者十五又內兵書敗曰戰若僖公戰于

○

井陘我師敗績獲公胄懸諸魚門諱不書敗唯莊公乾時之敗以與讎戰雖敗

八平

諱不

公來

始桓十年來戰于郎

六平

終哀十一年戰于艾陵

○圍四十四

綴其城邑曰圍

始隱五年宋圍長葛

終哀七年宋人圍曹

○入二十七

造其國都曰入

始隱二年莒人入向

終哀十三年於越入吳

○遷十

徙其朝市曰遷

始莊元年齊師遷紀邢鄆郡



終哀二年蔡遷州來

○滅三十

毀其宗廟社稷曰滅內兵書滅曰取若取鄆取邾是也唯僖公滅項乃公在會而季孫滅之故不諱

始莊十年齊師滅譚

終定十五年楚子滅胡

○敗師十有六

詭道而勝之曰敗

始隱十年公敗宋師于菅

終定十四年於越敗吳

○取師三

悉虜而俘之曰取

隱十年伐戴取之

哀九年雍丘

十三年于岳

○取國邑十有六

胡氏曰取者收奪之名趙子曰凡力得之曰取

始隱四年取牟婁

終哀八年取謹及闡

○襲一

輕行而掩之曰襲

襄二十三年齊侯襲

○追二

已去而躡之曰追

莊十八年公追戎于濟西





僖二十六年公追齊至鄆弗及

○戊三 聚兵而守之曰戊

僖二十八年公子買戍衛

襄五年戍陳 十年戍鄭虎牢

○以一國而用晉侯之師 以弱假強而能左右之曰以

桓十四年宋以四國伐鄭

僖二十六年魯以楚師伐齊

定四年蔡以吳子伐楚

○城二十有九 城者完舊也內城二十三不時害義固為罪矣雖時且義

亦書見勞民為室事也齊伯外城三邢也楚丘也緣陵也獨城邢為美晉伯外城二虎牢也杞也成周也獨成周無譏

始隱七年城中丘

終哀六年城邾瑕

○築八 築者創始也

莊元年築王姬之館 二十八年築鄒

三十一年三築臺 成十八年築鹿囿

昭九年築郎囿 定十三年築蛇淵囿

○執三十有一 齊執者五晉執者十五宋執者三邾執者一楚執者七



始桓十一年宋人執鄭祭仲

終哀四年晉執戎蠻子赤歸于楚

○獲六

凡君戰而死者滅生禽曰獲大夫生死皆曰獲

僖元年于酈獲莒拏

十五年于韓獲晉侯

宣二年大棘獲宋華元

襄八年鄭侵蔡獲蔡公子燮

昭二十三年雞父獲陳夏齧

哀十一年艾陵獲齊國書

○降二

降者脅服之詞

莊八年邾降于齊師

莊三十年齊人降鄆

○潰四

民逃其上曰潰

僖四年侵蔡蔡潰

文三年伐沈沈潰

成九年伐莒莒潰

昭二十九年鄆潰

○講武二

桓公有所畏而大閱非其時莊公有所俟而治兵非其地

桓六年大閱

簡車馬也

莊八年治兵

習戰也申明軍法以整有之也

○蒐五

中春教振旅遂以蒐謂蒐索擇取不孕者大蒐者備天子之制也



昭八年蒐于紅

十一年大蒐比蒲

二十二年大蒐昌間

定十三年大蒐比蒲

十四年大蒐比蒲

○狩四

中冬教大閱遂以狩謂守取之無所擇也

桓四年于郎

莊四年于禚

僖二十八年河陽

哀十四年獲麟

○乞師五

乞者卑遜自屈之辭又曰乞不保得之辭

僖二十六年公子遂如楚

三十一年齊人剽

成十三年晉卻錡來

十六年晉欒黶來

十七年晉荀瑩來

十八年晉士魴來

○次師十有三

齊次者四魯次者四齊衛次者三晉楚次者各一伐而書

次其次為善伐楚次陘是也救而書次其次為敗聶北救邢是也又曰莊十年次于郎見齊伯之難文十年次厥貉見楚伯之難襄元年次于鄆見晉復伯之難矣

始莊三年公次于滑

終定十五年齊衛次于渠蔭

○制楚得失七

召陵以義勝

城濮以威勝



鄆陵以幸勝

蕭魚以善勝

于泓以不度德不量力而敗

于邲以將不用命而敗

召陵以求貨弗得而還

○救二十三

救在王室則罪諸侯子突救衛是也救則遠國則罪四鄰晉陽

處父救江是也救在夷狄則罪中國楚貞救鄭狄救齊吳救陳是也

始莊六年子突救衛

終哀十年吳救陳

○獻捷二

獻者下奉上之詞軍獲曰捷

莊三十一年齊侯來獻戎捷

僖二十一年楚宜申來獻捷

○雩二十有一

旱祭也諸侯雩于境內之山川蓋以山川百源能興雲雨

故也

書秋者七

書八月者四

書七月者二

書九月者七

書冬者一

○郊九

龜違者四牛災者四非時大不敬者一蓋郊所以祭天魯諸侯而用天子

之祭僭也



僖三十一年四月四卜郊

宣三年正月牛傷乃不郊

成七年正月牛傷不郊

十年四月五卜郊

十七年九月辛丑用郊

襄七年四月三卜郊

十一年四月四卜郊

定十五年正月牛傷五月辛亥郊

哀元年正月牛傷四月辛亥郊

○望三 望祭也望于山川

僖三十一年

宣三年

成七年

○烝嘗三 冬曰烝衆也謂萬事畢成所薦衆多也秋曰嘗以物成而薦新為義

桓八年春正月巳卯烝

夏五月丁丑烝 十四年乙亥嘗

○土田十

假一 取五

歸我一 歸之于一



疆一

來歸一

○災異一百二十三

日食三十六

星孛三

星隕隕石各一

不雨七

無冰三

大雨震電一

雨雪三

大雨雹三

地震五

山崩二

大冰九

有年二

大旱二

饑三

無麥苗一

大無麥禾一

隕霜不殺草李梅實一

隕霜殺菽一

雨水水一

多麋有或或蜚蠊生各一

六鷁退飛一

螟三

蝻十

牛傷四

牛死二

宮室災六

震廟一

屋壞二

齊大災一

宋陳衛鄭災各一



宋陳災各一

○齊桓衣裳之會十有一

北杏二 兩郵六

兩幽 于榿四

于貫一 陽穀

首丘 甯母

葵丘 兩木木一

○齊桓兵車之會四

于洮 于鹹

牡丘 于淮

○晉文五書爵

侵曹 伐衛

入曹 城濮

踐土 十一平外

○晉襄退三強

僖三十三年敗秦于殽

敗狄于箕 伐許 許貳于楚 伐許所以離楚也

○晉悼五會



春秋四傳 提要 卷一

雞澤 于戚

救陳 于鄆

邢丘 于鄆

○晉悼三駕

襄十年伐鄭 十一年伐鄭

同年伐鄭

○晉平七合諸侯

溴梁 祝柯

澶淵 商任

沙隨 兩夷儀公會吳于澶

○晉平五合大夫

澶淵 于宋

城杞 澶淵

于虢

○春秋五始

元者氣之始 春者四時之始

王者受命之始 正月者正教之始

即位者一國之始

春秋四傳 提要 卷一



○孔子相魯

定十年會于夾谷

齊人來歸鄆郚謹龜陰田

十二年叔孫墮郕 季孫仲孫墮費

十四年石尚來歸賑

○子路用魯

定十二年墮郕

墮費

○子貢用魯

定十五年邾子來朝

哀七年公會吳于郟

十七年公會吳于橐臯

公會衛宋于郟

○冉求用魯

哀十一年齊國書伐我

○王人三

莊六年子突救衛

僖八年于洮

僖二十九年翟泉

○命大夫三

魯單伯

鄭祭仲































































































春秋四傳

諸國興廢說

禽於曲阜。地方七百里。分以寶玉大弓而俾侯於魯。以輔周室。伯禽父為魯公。考公會。考公九世孫曰惠公弗皇。惠公生隱公。息姑。隱公之元年。當平王四十四年。而春秋始作。其後二百四十有二年。是襄公蔣之十四年。西狩獲麟而下。九君二百三十三年。而頃公讎為楚考烈王所滅。遷為家人。

齊

按齊姜姓。侯爵。出自炎帝裔。伯夷為四嶽佐禹。平水土有功。賜姓曰呂。謂之呂侯。其國在南陽宛縣之西。商末。太公呂望起漁釣為周文武師。號師尚父。佐文武定天下。以功封營丘為齊侯。得征五侯九伯。其後桓公小白能相管仲。為五伯長。天下賴之。自僖公。祿父之九年。魯隱公立。至簡公四年。西狩獲麟。其後三君。一百單二年。康公卒。呂氏絕。

晉

其祀。田氏卒有齊國。

按晉姬姓。侯爵。出自周武王少子唐叔虞。成王母弟也。初邑姜方娠。有吉夢及生子。有文在其手曰虞。字子干。成王滅唐。翦桐葉為圭。與叔虞戲曰。以此封若。大臣史佚等以天子無戲言。請擇日而成之。遂封叔虞於唐。居古大夏。實沈之虛。參之分野。謂之太原。亦曰晉陽。在河汾之東北。地方百里。而都於翼。平陽絳。邑縣東翼城是也。唐叔子燮。父為晉侯。其數世孫文公重耳。霸諸侯。其子孫為中國盟主者百五十餘年。姬姓唯晉為霸主。王室賴之。自鄂侯二年。魯隱公即位。春秋作。至定公午三十一年。西狩獲麟。又六世。其臣韓魏趙氏三分晉地。遷其君為家人。



衛

按衛姬姓。侯爵。出自周武王同母少弟封為成王。大司寇。食采於康。謂之康叔。成王誅武庚。滅三監。中分其地。以其半立康叔。封為衛伯。分以大路。精茂。旃旌。大呂之樂。命以康誥。而封於商虛。其地汲郡朝歌縣是也。其數世孫桓公完。之十三年。魯隱公即位。春秋作。出公十二年。西狩獲麟。後十一世。聲公之子成侯。速復降爵為侯。速孫嗣君。更貶號曰君。而止有濮陽之地。後六世。而秦二世廢其君為庶人。

鄭

按鄭姬姓。伯爵。出自周厲王少子友。宣王母弟也。宣王二十二年。封友於鄭。在滎陽宛陵西南。密邇王畿。秦京兆。漢華陰之鄭縣是也。幽王之難。友寄帑於號。鄭之問。因取二國地。

宋

前華後河而食。溱洧。在濟西。洛東。河南。潁北。四水間。謂之新鄭。友卒。謚桓公。友相幽王。其子武公掘突。孫莊公寤生。皆相平王。為司徒。者三世。莊公二十二年。魯隱公即位。春秋作。聲公二十年。西狩獲麟。後一百四十四年。韓哀侯滅其國。

杞

按宋子姓。公爵。周二王後。出自商王帝乙之長庶子啓。食采於微。謂之微子。紂為不道。微子抱祭器以奔周。武王誅紂。立其子武庚。武庚以三監畔。成王誅之。中分其地。封微子為宋公。以奉湯祀。禮樂車服。悉如商舊。作賓王家。其地應天府睢陽是也。其後數世。孫穆公和之。七年。魯隱公立。景公三十六年。西狩獲麟。後六世。二百七十七年。而齊魏楚共滅其國。



按杞姒姓。伯爵。周二王後。武王克商。求夏禹苗裔。得東樓公。封杞以奉禹祀。其地今開封府雍丘是也。東樓公四傳而至武公。武公十一年。魯隱公立。後嘗遷都緣陵。又遷淳于。淳于蓋古之州國。至閔公維之。六年。西狩獲麟。後三十二年而國滅於楚。

陳

按陳媯姓。侯爵。周三恪之國。出自帝舜之後。封於有虞。虞幕裔孫闕父為周武王陶正。能利器用。王賴之。以元女大姬下嫁其子滿。而封諸陳。使奉虞帝祀。其地在太皞之墟。今陳縣是也。滿謚胡公。生申公犀。犀而下傳國十世。至桓公鮑。鮑二十三年。魯隱公立。閔公二十一年。西狩獲麟。後三年。楚惠王使公孫朝滅之。

吳

按吳姬姓。子爵。出自周太王長子太伯。與其弟仲雍。避少弟季歷賢而有聖子。去之荊蠻。號曰勾吳。端委以治周禮。荊蠻義之。歸者千餘家。為吳太伯。太伯卒。仲雍嗣立。斷髮交身。贏以為飾。遂不通中華。後十七世。當春秋魯成公六年。其後闔廬之子夫差。以強暴霸中國。夫差十五年。春秋終。後八年為越勾踐所滅。

楚

按楚芊姓。子爵。出自顓帝孫重黎。為高辛氏火正。能光融天下。命曰祝融。其弟吳回嗣為祝融。生陸終。生六子。皆剖析而產。最少者季連。季連之苗裔鬻熊。為周文武師。成王時。舉文王武王勤勞之後嗣。得鬻熊曾孫熊繹。封於荊蠻。胙以子男之田。其地居丹陽。南郡枝江縣是也。其後都郢。更名曰楚。至五世而熊通自立為楚武王。武王十九年。魯隱公立。惠



王章八年西狩獲麟。其後六國與秦號七雄。而楚最盛。惠王而下。有簡聲悼肅宣威懷頃襄考烈。幽哀負芻十。二王。而後秦滅之。

許

按許姜姓。男爵。出自堯四嶽伯夷之後。周武王封其苗裔文叔於許。以續太嶽之嗣。地在潁川。許昌縣。今許州是也。春秋時國小而近鄭。鄭再滅之。以為郟邑。後附楚。楚遷之于城父。又遷之于白羽。又遷之于葉。元公子結之元年。西狩獲麟。

秦

按秦嬴姓。伯爵。出自顓帝裔孫女修子大業。生大費。與禹平水土。佐舜。調馴鳥獸。賜姓嬴。是為柏翳。柏翳十九世非子。為周孝王主馬。汧渭間。馬大蕃息。孝王分為附庸。而邑之秦。

使續氏嬴。號曰秦嬴。天水隴西縣秦亭是也。其後文公四十四年。魯隱公立。至悼公十年。西狩獲麟。後九世。孝公用商鞅以耕戰霸秦。其子惠文君自號為王。至始皇并天下。自立為皇帝。至二世而亡。

蔡

按蔡姬姓。侯爵。出自周文王子叔度。武王克商。封於蔡。其地蔡州上蔡縣是也。自叔度至蔡伯荒。荒八世孫考父立為宣侯。宣侯二十八年。魯隱公立。成侯十年。西狩獲麟。後三十四年。而楚滅之。

曹

按曹姬姓。伯爵。出自文王子叔振鐸。武王克商。封之。其地濟陰定陶縣是也。叔振鐸生太



伯脾。脾後九世桓公終生即位。終生三十五年。魯隱公立。至哀公八年。曹伯陽為宋所滅。

北燕

按北燕姬姓伯爵。出自周同姓功臣曰君奭。佐文武定天下有大功。為周大保。食邑於召。謂之召康公。相成王。主自陝以西諸侯。封其子為北燕伯。其地幽州薊縣是也。召公九世至燕惠侯六世孫穆侯之七年。魯隱即位。獻公十二年。西狩獲麟。後六世易王立。傳王號者六世。至燕王喜坐太子丹事。為秦所破滅。

莒

按莒嬴姓。子爵。出自少昊之後。武王封茲與期於莒。城陽莒縣是也。莒夷君無謚而有號。自茲與期十一世而茲平始見於春秋。其公庚與而下。微不復見。後四世而楚滅之。

紀

按紀姜姓。侯爵。出自東莞劇縣。春秋時嘗娶魯女。又女為王后。魯莊公之三年。齊侵之。紀季以鄆入于齊。四年紀侯大去其國。

邾

按邾曹姓。子爵。出自陸終第五子晏安之後。武王克商。封其祐裔曹挾于邾為附庸。今魯國鄒縣是也。魯隱公之元年。邾儀父克會盟于蔑。其後數從齊侯小白尊周。進爵為子。克後九世。桓公革之。二十九年。西狩獲麟。邾近魯而小。後為楚所并。

小邾

按小邾曹姓。子爵。出自邾挾之後。夷父顏有功於周。周封其子友於邾為附庸。春秋時邾



黎來始朝魯其地在東海昌慮縣東北郟城是也齊小白霸郟君附從進爵為子始列諸侯謂之小邾子

虞

按虞姬姓公爵出自太王子仲雍生季簡季簡生叔達叔達生周章虞仲及武王克商求太伯仲雍之後得周章已為吳君別封其弟虞仲於周之北故夏墟在河東大陽縣自虞仲列為諸侯十二世有虞公者貪而無謀晉獻公用荀息計賂以璧馬而取其國

虢

按虢姬姓公爵出自王季子號仲文王弟也仲與虢叔為王卿士勲在王室藏於盟府而文王友愛二弟謂之二虢武王克商封仲於弘農陝縣東南之虢城周室東遷虢公忌父

滕

號公林父猶為天子之相魯僖公五年晉獻公假道於虞以伐虢滅之地入于晉

薛

按滕姬姓侯爵文王子叔繡之後也至宣公十七世乃見春秋後六世齊滅之

按薛任姓侯爵黃帝之後奚仲封于薛至獻侯始來朝魯與諸侯盟會



春秋四傳卷之一

宋胡安國著傳

附左明汪應魁句讀并校

隱公一

公名息姑。姬姓。侯爵。自周公子伯禽始受封。傳世二十三。而至隱公。攝主國事。在位十一年。諡法不尸其位曰隱。

左傳惠公元妃孟子。孟子卒。繼室以聲子。生隱公。宋武公生仲子。仲子生而有文在其手。曰為魯夫人。故仲子歸于我。生桓公。而惠公薨。是以隱公立而奉之。

胡傳孟子曰。王者之迹熄而詩亡。詩亡。然後春秋作。今按邶鄘而下。多春秋時詩也。而謂詩亡。然後春秋作。何也。自黍離降為國風。天下無復有雅。而王者之詩亡。





矣。春秋作於隱公。適當雅亡之後。又按小雅正月。刺幽王詩也。而曰赫赫宗周。褒姒滅之。逮魯孝公之末。幽王已為犬戎所斃。惠公初年。周既東矣。春秋不作於孝公。惠公者。東遷之始。流風遺俗。猶有存者。鄭武公入為司徒。善於其職。則猶用賢也。晉侯捍王于艱。錫之秬鬯。則猶有誥命也。王曰。其歸視爾師。則諸侯猶來朝也。義和之薨。謚為文侯。則列國猶有請也。及平王在位日久。不能自強於政治。棄其九族。葛藟有終。遠兄弟之刺。不撫其民。周人有束薪蒲楚之譏。至其晚年。失道滋甚。乃以天王之尊。下賄諸侯之妾。於是三綱淪。九法斁。人望絕矣。夫婦人倫之本。朝廷風化之原。平王子毋適。冢正后親遭褒姒之難。廢黜播遷。而宗國顛覆。亦可省矣。又不是懲而賄人寵妾。是拔本塞原。自滅之也。春秋於此。蓋有不得已焉耳。託始乎隱。不亦深切著

明也哉

周

文武開基。始都豐鎬。幽厲板蕩。平王東遷。洛陽。盡舉故都而棄之。秦所謂東周也。於是王室微弱。至平王四十九年。而入春秋。魯隱公三年。平王崩。桓王立。

鄭

姬姓。伯爵。自桓公始受封。周厲王之子。宣王之弟也。傳世武公。莊公。莊公元年。封弟段于京。二十二年。克

齊

姜姓。侯爵。自太公相武王定殷。受封于齊。受命專征。侯伯。傳世十三。至僖公九年。入春秋。子姓。公爵。周武王定殷。邦。封微子啓于宋。以奉殷祀。傳世十四。至穆公七年。入春秋。魯隱公三年。穆公卒。

宋

弟。殤公與夷立。姬姓。侯爵。自唐叔始受封。傳世十一。而至昭侯。昭侯封文侯之弟成師于曲沃。晉始亂。分



為二。以翼。曲沃別之。

翼

昭侯之後。傳季侯。鄂侯。鄂侯二年。入春秋。隱公五年。曲沃伐翼。翼侯奔隨。王命虢公立鄂侯之子光于翼。是為哀侯。隱公六年。晉逆晉侯于隨。納諸鄂。謂之鄂侯。

曲沃

成師之後。傳曲沃莊伯。曲沃莊伯之十一年十一月。魯隱公之元年正月也。蓋用夏正。建寅之月為歲首。不惟改元。又改曆矣。隱公七年。曲沃莊伯卒。子稱代立。是為曲沃武公。

衛

姬姓。侯爵。自康叔始受封。傳世十三。至桓公十三年。入春秋。魯隱公四年。衛州吁弑桓公自立。冬。殺州吁。宣公晉立。

蔡

姬姓。侯爵。蔡叔之子蔡仲率德改行。成王復封于蔡。傳世十三。至宣公二十八年。入春秋。

曹

魯隱公八年。宣公卒。子桓侯封人立。姬姓。伯爵。自曹叔振鐸始受封。傳世十二。至桓公終生三十五年。入春秋。

滕

姬姓。侯爵。至魯隱公七年。見滕侯卒。其後稱子。蓋為時王所黜。

陳

媯姓。侯爵。舜之後。自胡公始受封。傳世十二。至桓公二十三年。入春秋。

杞

姒姓。侯爵。夏禹之後。自東樓公始受封。傳五世。至武公十二年。入春秋。魯莊公二十七年。書杞伯來朝。蓋為時王所黜。其後又稱子。餘詳見僖公元年。

薛

任姓。侯爵。至魯隱公十一年。見來朝。莊公三十一年。書薛伯卒。蓋為時王所黜。其後至昭公三十一年。見葬薛獻公。

莒

已姓。子爵。至魯文公十八年。見庶其。



**邾** 曹姓。附庸國。自儀父入春秋。後為子。至魯莊公十六年。書邾子克卒。

**許** 姜姓。太岳之後。至魯隱公十一年。見許莊公及許叔。魯桓公十五年。許叔入于許。即魯僖公四年。許男新臣卒。葬許穆公也。

**小邾** 曹姓。顓頊之後。魯莊公五年。書邾黎來來朝。蓋附庸而未爵命。其後數從齊桓公尊王室。王命為諸侯。至魯僖公七年。始書小邾子。

**楚** 羊姓。子熊繹始受封。八世至熊渠。立其長子康為句亶王。申子紅為鄂王。少子執疵為越章王。此僭王之始也。又八世至熊儀。是為若敖。又二世至熊眴。是為蚡冒。又一世熊通。是為楚武王。武王十九年。入春秋。

**秦** 嬴姓。伯爵。顓頊之後也。殷有蜚廉。周有造父。周孝王使非子畜馬蕃息。分土為附庸。邑之。

秦。六世至襄公。將兵救周。送平王東遷。有功。封為諸侯。襄公卒。文公立。文公四十四年。是為隱公元年。又六世至穆公。任好十五年。魯僖公十五年。始見春秋。

**吳** 姬姓。子爵。自大伯作吳。五世至周章。而武王克殷。因封之吳。又十四世至壽夢。而吳始益大。稱王。魯成公七年。始見春秋。

**越** 其先禹之苗裔。少康之庶子也。封于會稽。以奉禹祀。後二十餘世。至於允常。魯昭公五年。僭楚伐吳。始見于春秋。允常與闔廬戰而相怨。伐定公十四年。允常卒。子句踐立。是為越王。是年吳伐越。越敗之于槁李。

**宋** 周平王四年。元年。齊僖公。祿父九年。晉鄂侯。郟桓公。完十三年。蔡宣公。考父二十八年。鄭莊公。寤生二十二年。曹桓公。終生三十五年。陳



桓公鮑二十三年杞武公二十九年宋穆公和七年秦文公四十四年楚武王熊通十九年

公羊傳元年者何君之始年也

**胡傳**

即位之一也。必稱元年者。明人君之用也。至哉

也。大哉。軋元。萬物資始。天之用也。至哉。坤元。萬物資生。地之用也。成位乎其中。則與天地參。故體元者。人君之職。而調元者。宰相之事。元。即仁也。仁。人心也。春秋深明其用。當自貴者始。故治國先正其心。以正朝廷。與百官。而遠近莫不壹於正矣。春秋立文兼述。作按舜典。紀元日。商訓稱元祀。此經書元年。所謂。謂。祖。二。帝。明。三。王。述。而。不。作。者。也。正。次。王。王。次。春。乃。立。法。創。制。裁。自。聖。心。無。所。述。於。人。者。非。史。策。之。舊。文。矣。

春王正月

左傳春王周正月。不書即位。攝也。

公羊傳春者何。歲之始也。王者孰謂。謂文王也。曷為先言王。而後言正月。王正月也。何言乎王正月。大一統也。公何以不言即位。成公意也。何成乎公之意。公將平國而反之桓。曷為反之桓。桓幼而貴。隱長而卑。其為尊卑也。微。國人莫知。隱長又賢。諸大夫叛隱而立之。隱於是焉。而辭立。則未知桓之將必得立也。且如桓立。則恐諸大夫之不能相幼君也。故凡隱之立。為桓立也。隱長又賢。何以不宜立。立適以長。不以賢。立子以貴。不以長。桓何以貴。母貴也。母貴。則子何以貴。子以母貴。母以子貴。

穀梁傳雖無事。必舉正月。謹始也。公何以不言即位。成公志也。焉成之。言君之不取為公也。君之不取為公。何也。將以讓桓也。讓桓正乎。曰。不正。春秋成人之美。不成人之惡。隱不正而成人之何也。將以惡桓也。其惡桓何也。隱



將讓而桓弑之。則桓惡矣。桓弑而隱讓。則隱善矣。善則其不正焉何也。春秋貴義而不貴惠。信道而不信邪。孝子揚父之美。不揚父之惡。先君之欲與桓。非正也。邪也。雖然。既勝其邪心。以與隱矣。已探先君之邪志。而遂以與桓。則是成父之惡也。兄弟天倫也。為子受之父。為諸侯受之君。已廢天倫而忘君父。以行小惠。曰小道也。若隱者可謂輕千乘之國。蹈道則未也。

**胡傳**

按左氏曰。王周正月。周人以建子為歲首。則冬十有一月是也。前乎周者。以丑為正。其書始即位。曰惟元祀十有二月。則知月不易也。後乎周者。以亥為正。其書始建國。曰元年冬十月。則知時不易也。建子非春亦明矣。乃以夏時冠周月。何哉。聖人語。顏回以為邦。則曰行夏之時。作春秋以經世。則曰春王正月。此見諸行事之驗也。或曰非天子不

議禮。仲尼有聖德。無其位。而改正朔。可乎。曰。有是言也。不曰春秋天子之事乎。以夏時冠月。垂法後世。以周正紀事。示無其位。不敢自專也。其旨微矣。加王於正者。公羊言大一統也。國君逾年改元。必行告廟之禮。國史主記時政。必書即位之事。而隱公闕焉。是仲尼削之也。古者諸侯繼世襲封。則內必有所承。爵位土田受之天子。則上必有所稟。內不承國於先君。上不稟命於天子。諸大夫拔已以立而遂立焉。是與爭亂造端。而篡弑所由起也。春秋首緇隱公以明大法。父子君臣之倫正矣。

**三月公及邾儀父盟于蔑**

父音甫。凡人名地名。故此蔑莫結反。凡書

邾公並作邾婁。公穀並作昧。此私盟之始。

左傳邾子克也。未王命。故不書爵。曰儀父。貴之也。公攝位而欲求好於邾。故為蔑之盟。



公羊傳及者何與也。會及暨皆與也。曷為或言會。或言及。或言暨。會猶最也。及猶汲汲也。暨猶暨暨也。及我欲之。暨不得已也。儀父者何。邾婁之君也。何以名。字也。曷為稱字。褒之也。曷為褒之。為其與公盟也。與公盟者眾矣。曷為獨褒乎。此因其可褒而褒之。此其為可褒奈何。漸進也。昧者何。地期也。穀梁傳及者何。內為志焉。爾儀字也。父猶傳也。男子之美稱也。其不言邾子何也。邾之上古微。未爵命於周也。不日其盟渝也。昧地名也。

**胡傳**

魯侯爵。而其君稱公。此臣子之詞。春秋從周之文。而不革者也。我所欲曰及。邾者魯之附庸。儀父其君之字也。何以稱字。中國之附庸也。王朝大夫例稱字。列國之命大夫例稱字。諸侯之兄弟例稱字。中國之附庸例稱字。其常也。聖人按是非。定褒貶。則有例。

當稱字。或黜而書名。例當稱人。或進而書字。其變也。常者道之正。變者道之中。春秋大義。公天下。以講信脩睦為事。而刑牲歃血。要質鬼神。則非所貴也。故盟有弗獲已者。而汲汲欲焉。惡隱公之私也。或言褒其首與公盟而書字失之矣。

**附錄**

左傳夏四月。費伯帥師城郎。不書。非公命也。

夏五月。鄭伯克段于鄆。

鄆音偃。

左傳初。鄭武公娶于申。曰武姜。生莊公。及共叔段。莊公寤生。驚姜氏。故名曰寤生。遂惡之。愛共叔段。欲立之。亟請于武公。公弗許。及莊公即位。為之請制。公曰。制巖邑也。虢叔死焉。佗邑唯命。請京。使居之。謂之京城大叔。祭仲曰。都城過百雉。國之害也。先王之制。大都。不過參國之一。中。五之一。小。九之一。今京不度。非制也。君將不堪。公曰。姜氏欲之。焉辟害。對



曰姜氏何厭之有。不如早為之所。無使滋蔓。蔓難圖也。蔓草猶不可除。況君之寵弟乎。公曰。多行不義。必自斃。子姑待之。既而大叔命西鄙北鄙貳於己。公子呂曰。國不堪貳。君將若之何。欲與大叔。臣請事之。若弗與。則請除之。無生民心。公曰。無庸。將自及。大叔又收貳以為己邑。至于廩延。子封曰。可矣。厚將得眾。公曰。不義。不暱。厚將崩。大叔完聚。繕甲兵。具卒乘。將襲鄭。夫人將啓之。公聞其期。曰。可矣。命子封帥車二百乘以伐京。京叛大叔段。段入于鄆。公伐諸鄆。五月辛丑。大叔出奔共。書曰。鄭伯克段于鄆。段不弟。故不言弟。如二君。故曰克。稱鄭伯。譏失教也。謂之鄭志。不言出奔。難之也。遂寘姜氏于城穎。而誓之曰。不及黃泉。無相見也。既而悔之。穎考叔為穎谷封人。聞之。有獻于公。公賜之食。食舍肉。公問之。對曰。小人有母。皆嘗小人之食矣。未嘗君之羹。請以遺之。公曰。爾有母遺。繫我獨無。穎考

叔曰。敢問何謂也。公語之故。且告之悔。對曰。君何患焉。若闕地及泉。隧而相見。其誰曰不然。公從之。公入。而賦。大隧之外。其樂也。洩洩。遂為母子如初。君子曰。穎考叔。純孝也。愛其母。施及莊公。詩曰。孝子不匱。永錫爾類。其是之謂乎。公羊傳。克之者何。殺之也。殺之則曷為謂之克。大鄭伯之惡也。曷為大鄭伯之惡。母欲立之。已殺之。如勿與而已矣。段者何。鄭伯之弟也。何以不稱弟。當國也。其地何。當國也。齊人殺無知。何以不地。在內也。在內。雖當國不地也。不當國。雖在外。亦不地也。穀梁傳。克者何。能也。何能也。能殺也。何以不言殺。見段之有徒眾也。段。鄭伯弟也。何以知其為弟也。段。弟也。而弗謂弟。公子也。而弗謂公子。貶之也。段。失子弟之道矣。賤段而甚鄭伯也。何甚乎鄭伯。甚鄭伯之處。心積慮成。於殺



也。于鄆。遠也。猶曰取之其母之懷中而殺之云爾。甚之也。然則為鄭伯者宜奈何。緩追逸賊。親親之道也。

**胡傳**

用兵大事也。必君臣合謀而後動。則當稱國。命公子呂為主帥。則當稱將。則當稱師。三者咸無稱焉。而專曰鄭伯。是罪之在伯也。猶以為未足。又書曰。處段于鄆。克者。力勝之詞。不稱弟。路人。也。于鄆。操之為已感矣。夫君親無將。段將以弟篡兄。以臣代君。必誅之罪也。而莊公特不勝其母焉。爾。曷為縱釋叔段。移于莊公。舉法若是失輕重哉。曰。姜氏當武公存之時。常欲立段矣。及公既沒。姜以國君嫡母主乎內。段以寵弟多才居乎外。國人又悅而歸之。恐其終將執也。為後患也。故授之大邑而不為之所。縱使失道。以至于亂。然後以叛逆討之。則國人不從。姜氏不敢主。而大叔屬籍當絕。不可復居。

父母之邦。此鄭伯之志也。王政以善養人。推其所為。使百姓興於仁而不偷也。況以惡養天倫。使陷於罪。因以翦之乎。春秋推見至隱。首誅其意以正人心。示天下為公。不可以私亂也。垂訓之義大矣。

秋七月天王使宰咺

反 吁阮

來歸惠公仲子之賵

賵撫鳳反。此王室下交諸侯之始。

左傳。緩且子氏未薨。故名。天子七月而葬。同軌畢至。諸侯五月。同盟至。大夫三月。同位至。士踰月。外姻至。贈死不及尸。弔生不及哀。豫凶事。非禮也。

公羊傳。宰者何。官也。咺者何。名也。曷為以官氏。宰。士也。惠公者何。隱之考也。仲子者何。桓之母也。何以不稱夫人。桓未君也。賵者何。喪事有賵。賵者蓋以馬。以乘馬束帛。車馬曰賵。



貨財曰賻。衣被曰襚。桓未君。則諸侯曷為來賻之。隱為桓立。故以桓母之喪告于諸侯。然則何言爾。成公意也。其言來何。不及事也。其言惠公。仲子何。兼之。兼之。非禮也。何以不言及仲子。仲子微也。

穀梁傳。母以子氏。仲子者何。惠公之母。孝公之妾也。禮。贈人之母。則可。贈人之妾。則不可。君子以其可辭受之。其志不及事也。贈者何也。乘馬曰贈。衣衾曰襚。貝玉曰舍。錢財曰賻。

**胡傳**。上古應時稱號。故其名三變。春秋以天自處。創制立名。繫王于天。為萬世法。其義備矣。冢宰稱宰。咺者名也。王朝公卿書官。大夫書字。上士中士書名。下士書人。咺。位六卿之長。而名之何也。仲子。惠公之妾爾。以天王之尊。下贈諸侯之妾。是加冠於屨。人適之大經。拂矣。天王。紀法之宗也。六卿。紀法之守也。議紀法而脩諸朝廷之上。則與聞其謀。頒

紀法而行諸邦國之間。則專掌其事。而承命以贈諸侯之妾。是壞法亂紀。自王朝始也。春秋重嫡妾之分。故特貶而書名。以見宰之非宰也。或曰。僖公之母成風。亦莊公妾也。其卒也。王使榮叔歸舍且贈。其葬也。王使召伯來會葬。下贈諸侯之妾。而名其宰。榮。召何以書字而不名也。於前贈仲子。則名冢宰。於後葬成風。王不稱天。其法嚴矣。

**附錄**。左傳八月。紀人伐夷。夷不告。故不書。有蜚。不為災。亦不書。

**九月及宋人盟于宿** 此參盟之端

左傳。惠公之季年。敗宋師于黃。公立而求成焉。九月。及宋人盟于宿。始通也。

公羊傳。孰及之。內之微者也。

穀梁傳。及者何。內卑者也。宋人。外卑者也。卑者之盟。不日。宿。邑名也。



**胡傳**

內稱及外稱人。皆微者。其地以國。宿亦與焉。微者盟會不志于春秋。此其志者。有宿國之君也。凡書盟者惡之。或曰。周官有司盟。掌盟載之。凡書盟者惡之。或曰。周官有戎右。役其事。太史。其約。蘇公亦曰。出此三物。以詛爾斯。夫盟以結信。出於人情。先王猶不禁也。而謂凡書盟者惡之。可乎。曰。盟以結信。非先王所欲而不禁。逮德下衰。欲禁之而不克也。春秋之時。會而歃血。其載果掌于司盟。猶不以爲善也。又況私相要誓。慢鬼神。犯刑政。以成傾危之習哉。今魯既及儀父。宋人盟矣。尋自叛之。信安在乎。故知凡書盟者惡之也。

**附錄**

左傳冬十月庚申。改葬惠公。公弗臨。故不書。惠公之薨也。有宋師。太子少葬。故有闕。是以改葬。衛侯來會葬。不見公。亦不書。○鄭共叔之亂。公孫滑出奔衛。衛人爲之伐也。

鄭取廩延。鄭人以王師。號師伐衛南鄙。請師于邾。邾子使私於公子豫。豫請往。公弗許。遂行。及邾人。鄭人盟于翼。不書。非公命也。新作南門。不書。亦非公命也。

**冬十有二月。祭伯來。**

側界。此王臣私交之始。

左傳非王命也。

公羊傳祭伯者何。天子之大夫也。何以不稱使。奔也。奔則曷爲不言奔。王者無外。言奔。則奔外之辭也。

穀梁傳來者來朝也。其弗謂朝何也。寰內諸侯。非有天子之命。不得出會諸侯。不正其外交。故弗與朝也。聘弓鏃矢。不出竟場。束脩之內。不行竟中。有至尊者。不貳之也。

胡傳按左氏曰。非王命也。祭伯。畿內諸侯。爲朝也。人臣義無私交。大夫非君命不越竟。所以然者。杜朋黨之原。爲後世事君而有貳心。

**胡傳**

按左氏曰。非王命也。祭伯。畿內諸侯。爲朝也。人臣義無私交。大夫非君命不越竟。所以然者。杜朋黨之原。爲後世事君而有貳心。



者之明戒也。惟此義不行。然後有藉外權。如繆留之語。韓宣惠者。交私議論。如莊助之結淮南者。倚強藩為援。以脅制朝廷。如唐盧攜之於高駢。崔胤之於宣武。昭緯之於邠岐者矣。經於內臣朝聘。皆赴。皆貶而不與。正其本也。豈有誣上行私。自植其黨之患哉。

### 公子益師卒

左傳：眾父卒。公不與。小斂。故不書日。公羊傳：何以不日。遠也。所見異辭。所聞異辭。所傳聞異辭。穀梁傳：大夫日卒。正也。不日卒。惡也。

**胡傳**：凡公子公孫。登名於史冊。貴戚之卿也。公子故而自為卿也。古者諸侯大夫。皆命於天子。卿卒必書。此春秋貴大臣之意。其不日也。公羊以為遠。然公子強遠矣。而書日。則非遠也。穀梁以為惡。然公子牙季孫意如惡矣。而

書日。則非惡也。左氏以為公不與小斂。然公孫敖卒于外。而公在內。叔孫舍卒于內。而公在外。不與小斂。明矣。而書日。左氏之說亦非也。其見恩數。之有厚薄歟。

**庚申** 平王五年 二年 齊僖十 魯鄆三 衛桓十四 蔡宣 十年 六 陳桓二十四 杞武一 二十 宋 穆八 秦文四十五 楚武二十

### 春公會戎于潛

此書會之始。亦會夷狄之始。

左傳：脩惠公之好也。戎請盟。公辭。穀梁傳：會者。外為主焉。爾。知者慮。義者行。仁者守。存此三者。然後可以出會。會戎。危公也。

**胡傳**：戎狄舉號。外之也。天無所不覆。地無所不載。天子與天地參者也。春秋天子之事。何獨外戎狄乎。曰：中國之有戎狄。猶君子之有小人。內君子。外小人。為秦。內小人。外君



子為否。春秋。聖人傾否之書。內中國而外四夷。使之各安其所也。無不覆載者。王德之體。內中國而外四夷者。王道之用。是故以諸夏而親戎狄。致金繒之奉。首顧居下。其策不可施也。以戎狄而朝諸夏。位侯王之上。亂常失序。其禮不可行也。以羌胡而居塞內。無出入之防。非我族類。其心必異。萌猾夏之階。其禍不可長也。為此說者。其知內外之旨。而明于馭戎之道。正朔所不加也。奚會同之有。書會戎。譏之也。

夏五月莒人入向

向舒亮反。○此入國之始。

左傳莒子娶于向。向姜不安。莒而歸。夏。莒人入向。以姜氏還。

公羊傳入者何。得而不居也。穀梁傳入者內弗受也。向。我邑也。

無駭帥師入極

駭。穀作倭。後同。帥。朔律反。後放此。○此大夫專兵之始。

左傳司空無駭入極。費沚父勝之。公羊傳無駭者何。展無駭也。何以不氏。貶。曷為貶。疾始滅也。始滅。昉於此乎。前此矣。前此則曷為始乎此。註始焉爾。曷為託始焉爾。春秋之始也。此滅也。其言入何。內大惡諱也。穀梁傳入者內弗受也。極。國也。苟焉以入人。為志者。人亦入之矣。不稱氏者。滅同姓也。

胡傳

左氏曰。莒子娶于向。向姜不安。莒而歸。書曰。莒人入向。以姜氏還。此所謂按也。春秋造其國都。以義言之。人者逆而不順。莒稱人。小國也。無駭不氏。未賜族也。其書帥師。用大眾也。非王命而入人國邑。逞其私意見諸侯之。不臣也。擅興而征討不加焉。見天王之。不君也。據事直書。義自見矣。

秋八月庚辰。公及戎盟于唐

此盟戎狄之始。



左傳戎請盟秋盟

于唐復脩戎好也

胡傳按費誓稱淮夷徐戎此蓋徐州之戎久居中國在魯之東郊者也韓愈氏言春秋謹嚴君子以為深得其旨所謂謹嚴者何

謹乎莫謹於華夷之辨矣中國而夷狄則狄之夷狄猶夏則膺之此春秋之旨也而與戎狄血以約盟非義矣是故成於日者必以事繫日而前此盟于蔑則不日盟于宿則不日後此盟于密則不日盟于石門則不日獨盟于唐而書日者謹之也後世乃有結戎狄以許婚而配偶非其類如西漢之於匈奴約戎狄以求援而華夏被其毒如肅宗之於回紇信戎狄以與盟而臣主蒙其恥如德宗之於尚結贊雖悔於終亦將奚及春秋謹唐之盟垂戒遠矣

九月紀履緌來逆女

綸音須履綸左作裂繻

冬十月伯姬歸于紀

左傳卿為君逆也

公羊傳紀履緌者何紀大夫也何以不稱使婚禮不稱主人然則曷稱稱諸父兄師友宋公使公孫壽來納幣則其稱主人何辭窮也辭窮者何無母也然則紀有母乎曰有有則何以不稱母母不通也外逆女不書此何以書譏何譏爾譏始不親迎也始不親迎助於此乎前此矣前此則曷為始乎此託始焉爾曷為託始焉爾春秋之始也女曷為或稱女或稱婦或稱夫人女在其國稱女在塗稱婦入國稱夫人伯姬者何內女也其言歸何婦人謂嫁曰歸穀梁傳逆女親者也使大夫非正也以國氏者為其來交接於我故君子進之也禮婦人謂嫁曰歸反曰來歸從人者也婦人在家制於父既嫁制於夫夫死從長子婦人不專行



必有從也。伯姬歸于紀。此其如專行之辭。何也。曰非專行也。吾伯姬歸于紀。故志之也。其不言使何也。逆之道微。無足道焉。爾。

**胡傳**

按穀梁子。逆女親者也。使大夫非正也。魯哀公問冕而親迎。不已重乎。孔子對曰。合二姓之好。以為宗廟社稷主。君何謂已重乎。文定厥祥。親迎于渭。造舟為梁。不顯其光。則世子而親迎也。韓侯娶妻。蹶父之子。韓侯迎止。于蹶之里。則諸侯而親迎也。有夫婦然後有父子。有父子然後有君臣。夫婦人倫之本也。逆女必親。使大夫非正也。入春秋之始。名宰咺歸賵。以譏亂法。書履綸逆女。以志變常。衆妾之分定矣。大昏之禮嚴矣。

**紀子伯莒子盟于密**

伯左作帛。此外相盟之始。

左傳魯故也。

公羊傳紀子伯者何。無聞焉。爾。

穀梁傳或曰。紀子伯莒子而與之盟。或曰。年同爵同。故紀子以伯先也。

**胡傳**

凡闕文。有斷以大義。削之而非闕者。有本據舊史。因之而不能益者。亦有先儒傳授。承誤而不敢增者。如隱不書即位。桓不書葬。王。則葬成風。王不書天。吳楚之君。卒不書葬。夏五。紀子伯莒子盟于密之類。或曰。本據舊史。因之而不能益者也。或曰。先儒傳授。承誤而不敢增者也。闕疑而慎言其餘。可矣。必曲為之說。則鑿矣。

**十有二月乙卯。夫人子氏薨。**

公羊傳夫人子氏者何。隱公之母也。何以不書葬。成公意也。何成乎公之意。子將不終為君。故母亦不終為夫人也。穀梁傳夫人薨不地。夫人者。隱之妻也。卒而



不書葬。夫人之義從君者也。

**胡傳**

按穀梁子曰。夫人子氏者。隱之妻也。卒而。不書葬。夫人之義從君者也。邦君之妻。國人稱之曰小君。卒則書薨。以明齊也。先卒則不書葬。以明順也。有夫婦然後有父子。有父子然後有君臣。夫婦人倫之本也。入春秋之始。於子氏書薨。不書葬。明示大倫。苟知其義。則夫夫婦婦。而家道正矣。

**鄭人伐衛**

此諸侯專征伐之始。

左傳討公孫滑之亂也。

**胡傳**

按左氏。鄭共叔之亂。公孫滑出奔衛。衛人為之伐鄭。取廩延。至是鄭人伐衛。討滑之亂也。凡兵聲罪致討曰伐。潛師掠境曰侵。兩兵相接曰戰。環其城邑曰圍。造其國都。

曰入。徙其朝市曰遷。毀其宗廟社稷曰滅。詭道而勝之曰敗。悉虜而俘之曰取。輕行而掩之曰襲。已去而躡之曰追。聚兵而守之曰戍。以弱假強而能左右之曰以。皆誌其實。以明輕重。內兵書敗曰戰。書滅曰取。特婉其辭。為君隱也。征伐天子之大權。今鄭無王命。雖有言可執。亦王法所禁。况於脩怨乎。不書戰者。程氏以為衛已服也。衛服則可免矣。此義施于伐而不書戰。皆可通矣。



春秋四傳卷之一

春秋四傳卷之二

宋胡安國著傳

附左  
公叔

明汪應魁句讀

并校  
訂

隱公二

辛酉平王五十三年

齊僖十一 晉鄂四 衛桓十五 蔡宣三十 鄭莊二十四 曹桓

三十七 陳桓二十五 杞武三十一 宋穆九 卒 秦文四十六 楚武二十一

春王二月己巳日有食之

公羊傳何以書記異也。日食則曷為或日或不日。或言朔或不言朔。曰某月某日朔日有食之者。食正朔也。其或日或不日。或失之前。或失之後。失之前者。朔在前也。失之後者。朔在後也。  
穀梁傳言日不言朔。食晦日也。其日有食之。



何也。吐者外壤。食者內壤。闕然不見其壤。有食之者也。有內辭也。或外辭也。有食之者。內於日也。其不言食之者何也。知其不可知也。

**胡傳**

經書日食三十六。去之十有餘歲。而精曆算者所能考也。其行有常度矣。然每食必書。示後世治曆明時之法也。有常度。則災而非異矣。然每食必書。示後世遇災而懼之意也。日者。衆陽之宗。人君之表。而有食之。災咎象也。克謹天戒。則雖有其象。而無其應。弗克畏天。災咎之來必矣。凡經所書者。或妾婦乘其夫。或臣子背君父。或政權在臣下。或夷狄侵中國。皆陽微陰盛之證也。是故十月之交。詩人以刺。日有食之。春秋必書。以戒人君不可忽天象也。

三月庚戌天王崩

左傳三月壬戌平王崩。赴以庚戌。故書之。公羊傳何以不書葬。天子記崩不記葬。必其時也。諸侯記卒記葬。有天子存。不得必其時也。曷為或言崩。或言薨。天子曰崩。諸侯曰薨。大夫曰卒。士曰不祿。穀梁傳高曰崩。厚曰崩。尊曰崩。天子之崩。以尊也。其崩之何也。以其在民上。故崩之。其不名何也。大上故不名也。

**胡傳**

崩者。上墜之形。春秋歷十有二王。桓。襄。也。平。惠。定。靈。志崩。志葬者。赴告及魯往會之會也。莊。僖。頃。崩葬。皆不志葬者。赴告雖及魯。亦不往也。諸侯為天王服斬衰。禮當以所聞先。後而奔喪。今平王崩。周人來訃。而隱公不往。是無君也。其罪應誅。不書而自見矣。或曰。萬國至衆也。封疆至重也。天王之喪。不得越境。以奔。而修服於國。卿供弔送之禮。訖葬。卒哭而除喪。禮乎。按周書康王之誥。太保率西方。



諸侯入應門左。畢公率東方諸侯入應門右。再拜趨出。王反喪服。此奔成王之喪者。安得以為修服於國而可乎。故周人有喪。魯人有喪。周人往弔。謂使人可也。魯人不往。謂當親之者。而不可使人代也。諸侯歲時。或朝覲於京師。或會同於方嶽。或從兵革征討之事。越境踰時。不以為難。何獨難於奔喪。而薄君臣始終存歿之義哉。大非先王之禮。失春秋之義矣。

夏四月辛卯尹氏卒

尹左作君

左傳夏君氏卒。聲子也。不赴於諸侯。不反哭於寢。不祔於姑。故不曰薨。不稱夫人。故不言葬。不書姓。為公故。曰君氏。  
公羊傳尹氏者何。天子之大夫也。其稱尹氏何。貶。曷為貶。譏世卿。世卿非禮也。外大夫不卒。此何以卒。天王崩。諸侯之主也。

穀梁傳尹氏者何也。天子之大夫也。外大夫不卒。此何以卒之也。於天子之崩為魯主。故隱而卒之。

胡傳

尹氏。天子大夫。世執朝權。為周階亂。家父所刺。秉國之均。不平。謂何者。是也。因其告喪。與立子朝。以朝奔楚。皆以氏書者。志世卿非禮。為後鑒也。或曰。世卿非禮。裳裳者華。何以作乎。曰。功臣之世。世其祿。世卿之官。嗣其位。祿以報功也。故其世可延。位以尊賢也。故其官當擇。官不擇人。世授之柄。黨與既眾。威福下移。大姦根據。而莫除。人主孤立。而無助。國不亡。幸爾。春秋於周書尹氏。武氏。仍叔之子。於魯書季友。仲遂。皆志其非禮也。公羊子此說。必有所受矣。

附錄

左傳鄭武公莊公為平王卿士。王貳於號。鄭伯怨王。王曰無之。故周鄭交質。王



子狐為質於鄭。鄭公子忽為質於周。王崩。周人將異號公政。四月。鄭祭足帥師取溫之麥。秋。又取成周之禾。周鄭交惡。君子曰。信不由中。質無益也。明恕而行。要之以禮。雖無有質。誰能間之。苟有明信。澗谿沼沚之毛。蘋蘩蕓藻之菜。筐筥錡釜之器。潢汙行潦之水。可薦於鬼神。可羞於王公。而況君子結二國之信。行之。以禮。又焉用質。風有采蘩采蘋。雅有行葦。洞酌。昭忠信也。

秋武氏子來求賻

賻音附。○此來求之始。

左傳。王未葬也。公羊傳。武氏子者何。天子之大夫也。其稱武氏子何。譏。何譏。爾父卒。子未命也。何以不稱使。當喪未君也。武氏子來求賻。何以書。譏。何譏。爾喪事無求。求賻非禮也。蓋通于下。穀梁傳。武氏子者何也。天子之大夫也。天子

之大夫。其稱武氏子何也。未畢喪。孤未爵。未爵使之非正也。其不言使何也。無君也。歸死者曰賻。歸生者曰賵。曰歸之者。正也。求之者。非正也。周雖不求。魯不可以不歸。魯雖不歸。周不可以求之。求之為言。得不得未可知之辭也。交譏之。

胡傳

武氏。天子之大夫。何以不稱使。當喪未君何也。古者君薨。諒陰。百官總已。以聽於冢宰。三年。夫百官總已。以聽。則是攝行軍國之事也。以非王命。而不稱使。春秋之旨。微矣。於以謹天下之通喪。而嚴君臣之名分也。夫賻以貨財。則生者所須索也。君取於臣。不言求。而曰求賻。求車。求金。皆著天王之失道也。上失其道。則下不臣矣。

八月庚辰宋公和卒



左傳宋穆公疾召大司馬孔父而屬殤公焉。曰先君舍與夷而立寡人寡人弗敢忘若以大夫之靈得保首領以沒先君若問與夷其將何辭以對請子奉之以主社稷寡人雖死亦無悔焉對曰羣臣願奉焉也公曰不可先君以寡人為賢使主社稷若棄德不讓是廢先君之舉也豈曰能賢光昭先君之令德可不務乎吾子其無廢先君之功使公子馬出居於鄭八月庚辰宋穆公卒殤公即位君子曰宋宣公可謂知人矣立穆公其子饗之命以義夫商頌曰殷受命咸宜百祿是荷其是之謂乎

穀梁傳諸侯

日卒正也

胡傳

外諸侯卒國史承告而後書聖人皆存而弗削曷為弗削春秋天子之事也古者諸侯之邦交間問殷聘而世相朝蓋王事相從則有和好之情及告終易代則有弔恤

之禮是諸侯所以睦鄰國也周制王哭諸侯則大宗伯為上相司服為王制總麻宰夫掌邦之弔事戒令與其幣器財用是王者所以懷諸侯也凡諸侯卒皆存弗削而交鄰國待諸侯之義見矣卒而或日或不日者何謹則書日慢則書時其大致然也卒而或名或不名者何會盟則各於載書聘問則各於簡牘未嘗會盟聘問而無所證者雖使至告喪其名亦不可得而知矣凡此類因舊史而不革者也諸侯曰薨大夫曰卒五等邦君何以書卒夫子作春秋則有革而不因者周室東遷諸侯放恣專享其國而上不請命聖人奉天討以正王法則有貶黜之刑矣因其告喪特書曰卒不與其為諸侯也故曰知我者其惟春秋乎罪我者其惟春秋乎

冬十有二月齊侯鄭伯盟于石門

此外諸侯特相盟之始



左傳冬齊鄭盟于石門尋盧之

**胡傳**

外盟會常事也何以書在春秋之亂世

氏未施信於民而民信夏后氏未施敬於民而民敬殷人作誓而民始畔周人作會而民始疑子曰大道之行與三代之英丘未之逮也而有志焉諸侯會盟來告則書而弗削者其諸以是為非常典而有志於天下為公之世乎故凡書盟者惡之也

癸未葬宋穆公

穆公穀作

公羊傳葬者曷為或日或不日不及時而日渴葬也不及時而不日謂之不日慢葬也過時而日隱之也過時而不日謂之不能葬也當時而不日正也當時而日危不得葬也此當時何危爾宣公謂繆公曰以吾愛與夷則不若愛女以為社稷宗廟主則與夷不若女蓋終為君

矣宣公死繆公立繆公逐其二子莊公馮與左師勃曰爾為吾子生母相見死母相哭與夷復曰先君之所為不與臣國而納國乎君者以君可以為社稷宗廟主也今君逐君之二子而將致國乎與夷此非先君之意也且使子而可逐則先君其逐臣矣繆公曰先君之不爾遂可知矣吾立乎此攝也終致國乎與夷莊公馮弒與夷故君子大居正宋之禍宣公為之也

**穀梁傳**

日葬故也危不得葬也

**胡傳**

外諸侯葬其事則因魯會而書其義則

子之事也傳稱諸侯五月而葬同盟至同盟謂同方嶽之盟者其生講會同之好其沒有葬送之禮是諸侯所以睦鄰國也按周制有職喪掌諸侯之喪禮蒞其禁令序其事凡諸侯及諸臣葬於墓者則冢人授之兆為之蹕而均其禁是王者所以懷諸侯也外諸侯葬



或存或削而交鄰國待諸侯之義見矣葬而或日或不日者何備則書日略則書時其大不葬者有弱其君而不葬者有討其賊而不葬者有諱其辱而不葬者有治其罪而不葬者有避其號而不葬者宋殤齊昭告亂書弑矣而經不書葬是討其賊而不葬者也晉主夏盟在景公時告喪書日矣而經不書葬是諱其辱而不葬者也魯宋盟會未嘗不同而三世不葬是治其罪而不葬者也吳楚之君書卒者十亦有親送於西門之外者矣而經不書葬是避其號而不葬者也怠於禮而不往弱其君而不會無其事闕其文魯史之舊也討其賊而不葬諱其辱而不葬治其罪而不葬避其號而不葬聖人所削春秋之法也故曰知我者其惟春秋乎罪我者其惟春秋乎

附錄

左傳衛莊公娶于齊東宮得臣之妹曰莊姜美而無子衛人所為賦碩人也又娶于陳曰厲嬀生孝伯早死其娣戴嬀生桓公莊姜以為己子公子州吁嬖人之子也寵而好兵公弗禁莊姜惡之石碏諫曰臣聞愛子教之以義方弗納于邪驕奢淫佚所自邪也四者之來寵祿過也將立州吁乃定之矣若猶未也階之為禍夫寵而不驕驕而能降降而不憾憾而能矜者鮮矣且夫賤妨貴少陵長遠間親新間舊小加大淫破義所謂六逆也君義臣行父慈子孝兄愛弟敬所謂六順也去順效逆所以速禍也君人者將禍是務去而速之無乃不可乎弗聽其子厚與州吁游禁之不可桓公立乃老

戊壬 桓王四年 齊僖十二年 晉鄂五 衛桓十六 弑 祭 元年 宣三十一 鄭莊二十五 曹桓三十 八 陳桓二十六 杞武三十二 宋殤公 與夷元年 秦文四十七 楚武二十二



春王二月。莒人伐杞。取牟婁。

此伐國取邑之始。

公羊傳牟婁者何。杞之邑也。外取邑不書。此何以書。疾始取邑也。

穀梁傳傳曰。言伐言取。所惡也。諸侯相伐取地於是始。故謹而志之也。

**胡傳**

取者。收奪之名。牟婁。杞邑也。聲罪伐人而強奪其土。故特書曰取。以著其惡。或曰。諸侯土地。上受之天王。下傳之先祖。所以守宗廟之典籍也。聖王不作。諸侯放恣。強者多兼數圻。弱者日以侵削。當是時。有取其故地者。夫豈不可。然僖公嘗取濟西田矣。成公嘗取汶陽田矣。亦書曰取。何也。苟不請於天王。以正疆理。而擅兵爭奪。雖取本邑。與奪人之有者。無以異。春秋之義。不以亂易亂。故亦書曰取。正其本之意也。上二年。莒人擅與入向。而天討不加焉。至是。伐國取邑。其暴益肆矣。

左傳衛州吁弑桓公而立。公羊傳曷為以國氏。當國也。穀梁傳大夫弑其君。以國氏者。嫌也。弑而代之也。

戊申。衛州吁弑其君完。

完音九州。穀作祝。後同。此書弑之始。

左傳衛州吁弑桓公而立。

公羊傳曷為以國氏。當國也。

穀梁傳大夫弑其君。以國氏者。嫌也。弑而代之也。

**胡傳**

此衛公子州吁也。而削其屬籍。特以國氏者。罪莊公不待之。以公子之道。使預

聞政事。主兵權。而當國也。以公子之道。待州吁。教以義方。弗納於邪。不以賤妨貴。少陵長。則桓公之位定矣。亂何由作。州吁有寵。好兵而公弗禁。石碯盡言極諫。而公弗從。是不待以公子之道。使預聞政事。主兵權。而當國也。春秋之旨。在於端本清源。以衛詩綠衣諸篇考之。所謂前有讓而不見。後有賊而不知者。莊公是也。其不稱公子。而以國氏。著後世為人君父者之戒。爾。故傳有之曰。為人君父。而不通春秋之義者。必蒙首惡之名。



夏公及宋公遇于清

此書遇之始

左傳公與宋公為會將尋宿之盟未及期衛人來告亂夏公及宋公遇于清

公羊傳遇者何不期也一君出一君要之也穀梁傳及者內為志焉爾遇者志相得也

胡傳

遇者草次之期古有遇禮不期而會以明造次亦有恭肅之心春秋書遇私為

之約自此於不期而遇者直欲簡其禮爾簡略慢易無國君之禮則莫適主矣故志內之

遇者四而皆書及若曰以此及彼然也志外之遇者三而皆以爵若曰以尊及卑然也其

意以為莫適主者異於古之不期而會矣故凡書遇者皆惡其無人君相見之禮也

宋公陳侯蔡人衛人伐鄭

此諸侯會伐之始亦

左傳宋殤公之即位也公子馮出奔鄭鄭人欲納之及衛州吁立將脩先君之怨於鄭而

求寵於諸侯以和其民使告於宋曰君若伐鄭以除君害君為主敝邑以賦與陳蔡從則

衛國之願也宋人許之於是陳蔡方睦于衛故宋公陳侯蔡人衛人伐鄭圍其東門五日

而還公問于衆仲曰衛州吁其成乎對曰臣聞以德和民不聞以亂以亂猶治絲而棼之

也夫州吁阻兵而安忍阻兵無衆安忍無親衆叛親離難以濟矣夫兵猶火也弗戢將自

焚也夫州吁弑其君而虐用其民於是乎不務令德而欲以亂成必不免矣

胡傳

春秋之法誅首惡與是役者首謀在衛而以宋主兵何也前書州吁弑君其罪

已極至是阻兵脩怨勿論可也而鄰境諸侯聞衛之有大變也可但已乎陳恒弑簡公孔

子沐浴而朝告於哀公請討之公曰告夫三子者子曰以吾從大夫之後不敢不告也之

三子告不可子曰以吾從大夫之後不敢不告也然則鄰有弑逆聲罪赴討雖先發而後



聞可矣。宋殤不恤衛有弑君之難。欲定州吁而從其邪說。是肆人欲滅天理。非人之所為也。故以宋公為首。諸國為從。示誅亂臣。討賊子。必先治其黨與之法也。此義行。為惡者孤矣。故曰春秋成而亂臣賊子懼。

秋翬

許歸反

帥師

此大夫會伐之始

左傳秋。諸侯復伐鄭。宋公使來乞師。公辭之。羽父請以師會之。公弗許。固請而行。故書曰。翬帥師。疾之也。公羊傳。翬者何。公子翬也。何以不稱公子。貶曷為貶。與弑公也。其與弑公奈何。公子翬諂乎隱公。謂隱公曰。百姓安子。諸侯說子。盍終為君矣。隱曰。吾否。吾使脩塗裘。吾將老焉。公子翬恐。若其言聞乎桓。於是謂桓曰。吾為子口隱矣。隱曰。吾不反也。桓曰。然則奈何。曰。請作難。弑隱公。於鍾巫之祭焉。弑隱公也。

穀梁傳。翬者何也。公子翬也。其不稱公子何也。貶之也。何為貶之也。與于弑公。故貶也。

胡傳

按左氏。諸侯謀伐鄭。宋公使來乞師。公辭之。羽父請以師會之。公弗許。固請而行。易曰。履霜。堅冰至。履霜。陰始凝也。馴致其道。至堅冰也。臣弑其君。子弑其父。非一朝一夕之故。其所由來者漸矣。由辨之不早辨也。宋人來乞師。而公辭之。羽父請以師會。而公弗許。其辭而弗許。義也。翬以不義強其君。固請而行。無君之心兆矣。夫公子公孫。升為貴戚之卿者。其植根膠固。難御於異姓之卿。況翬已使主兵。而方命乎。隱公不能辨之於早。罷其兵權。猶使之帥師也。是以及鍾巫之禍。春秋於此。去其公子。以謹履霜之戒。

會宋公陳侯蔡人衛人伐鄭

左傳。諸侯之師敗鄭。徒兵。賧其禾而還。



**胡傳**

春秋立義至精。詞極簡嚴而不贅也。若曰：輦帥師會伐鄭。豈不白乎？再序四國。何其詞費不憚煩也。言之重。詞之複。其中必有大美惡焉。四國合黨。輦復會師。同伐無罪之邦。欲定弑君之賊。惡之極也。言之不足而再言。聖人之情見矣。天地造物。化工運其神。春秋討賊。聖筆寫其意。再序四國。而誅討亂臣之法嚴矣。

九月衛人殺州吁于濮

濮音卜

左傳州吁未能和其民。厚問定君於石子。石子曰：王覲為可。曰：何以得覲？曰：陳桓公方有寵於王。陳衛方睦。若朝陳使請。必可得也。厚從州吁如陳。石碚使告于陳曰：衛國褊小。老夫耄矣。無能為也。此二人者。實弑寡君。敢即圖之。陳人執之。而請蒞于衛。九月。衛人使右宰醜蒞殺州吁于濮。石碚使其宰孺羊肩蒞殺石厚于陳。君子曰：石碚。純臣也。惡州吁而

厚與焉。大義滅親。其是之謂乎。

公羊傳其稱人何？討賊之辭也。

穀梁傳稱人以殺殺有罪也。祝吁之挈。失嫌也。其月。謹之也。于濮者。譏失賊也。

**胡傳**

伐鄭稱人。責詞也。殺州吁稱人。衆詞也。知然者。伐鄭之役。公孫文仲為主將。而

變文稱人。則是指國人聽州吁號令。從文仲

而南行者也。故曰責詞。其殺州吁。則石碚謀

之。而使右宰醜蒞也。變文稱人。則是人皆有

欲討賊之心。亦夫人之所得討也。故曰衆詞。

公羊子曰：稱人者何？討賊之詞也。其義是矣。

于濮者。憫衛國之人。著諸侯之罪也。衛人失

賊而曰著諸侯之罪何也？夫州吁二月弑君

而不能即討者。緣四國連兵。欲定其位。故久

然後能殺之于濮耳。非諸侯之罪而何？夫以

討賊許衆人。而以失賊罪鄰國。與賊者寡矣。

故曰春秋成而

亂臣賊子懼



冬十有二月。衛人立晉。

左傳衛人逆公子晉于邢。冬十二月。宣公即位。書曰衛人立晉。衆也。

公羊傳晉者何。公子晉也。立者何。立者不宜也。其稱人何。衆立之之辭也。然則孰立之。

石碻立之。石碻立之。則其稱人何。衆之所欲立也。衆雖欲立之。其立之非也。

穀梁傳衛人者。衆辭也。立者。不宜立者也。晉之名惡也。其稱人以立之。何也。得衆也。得衆。

則是賢也。賢則其曰不宜立。何也。春秋之義。諸侯與正而不與賢也。

**胡傳**

人衆辭。立者。不宜立也。晉雖諸侯之子。內不承國於先君。上不稟命於天子。衆謂宜立而遂自立焉。可乎。故春秋於衛人。特書曰立。所以著擅置其君之罪。於晉。絕其公子。所以明專有其國之非。以此垂法。而父子君臣之美明矣。未有爲子而不受之父也。未

有爲諸侯而不受之王也。

有爲諸侯而不受之王也。

**癸亥**

桓王五年。齊僖十三年。晉鄂六年。衛宣公晉元年。蔡宣三十二年。鄭莊二十六年。曹桓

三十九年。陳桓二十七年。杞武三十二年。宋殤二。秦文四十八。楚武二十三年。

春。公觀魚于棠。

觀左作矢。

左傳公將如棠觀魚者。臧僖伯諫曰。凡物不足以講大事。其材不足以備器用。則君不舉焉。君將納民於軌物者也。故講事以度軌。量謂之軌。取材以章物。采謂之物。不軌不物。謂之亂政。亂政亟行。所以敗也。故春蒐夏苗。秋獮冬狩。皆於農隙以講事也。三年而治兵。入而振旅。歸而飲至。以數軍實。昭文章。明貴賤。辨等列。順少長。習威儀也。鳥獸之肉。不登於俎。皮革齒牙。骨角毛羽。不登於器。則公不射。古之制也。若夫山林川澤之實。器用之資。阜



隸之事。官司之守。非君所及也。公曰。吾將略地焉。遂往。陳魚而觀之。僖伯稱疾不從。書曰。公矢魚于棠。非禮也。且言遠地也。公羊傳。何以書。譏何譏爾。遠也。公曷為遠而觀魚。登來之也。百金之魚。公張之。登來之者。何。美大之之辭也。棠者何。濟上之邑也。穀梁傳。傳曰。常事曰視。非常曰觀。禮尊不親小事。卑不尸大功。魚。卑者之事也。公觀之。非也。正。公觀之。非也。

**胡傳**

齊景公問於晏子。吾欲觀於轉附朝舞。於先王觀也。對曰。天子適諸侯曰巡狩。巡所守也。諸侯朝於天子曰述職。述所職也。無非事者。春省耕而補不足。秋省斂而助不給。是故諸侯非王事則不出。非民事則不出。今隱公慢棄國政。遠事逸遊。濳伯之忠言不見納。亦已矣。又從而為之辭。是縱欲而不能自克也。

之以禮也。能無鍾巫之及乎。特書觀魚。譏之也。

**附錄**

左傳。曲沃莊伯以鄭人邢人伐翼。王使尹氏武氏助之。翼侯奔隨。

夏四月葬衛桓公

左傳。衛亂。是以緩。穀梁傳。月葬。故也。

**胡傳**

衛亂。是以緩。魯往會。故書。聖人存而弗削者。弒逆之賊討矣。謚者行之迹。所以紀實德。垂勸戒也。名之曰幽厲。雖孝子慈孫。百世不能改。失位而見弒。何以為桓。列爵惟五。皆王命也。衛本侯爵。何以稱公。見臣子不請於王而私自謚爾。程氏曰。正終大事也。必於正寢。而不歿於婦人之手。豈苟然乎。死而加之不正之謚。知忠孝者不忍為也。春秋於邦君薨。正以王法而書卒。至於葬。則從其私謚。而稱公。或革或因。前以貶不臣順之諸侯。



後以罪不忠孝之臣子。辭顯而義微。昔所以過人。欲存天理。大居正也。

**附錄**

左傳四月。鄭人侵衛。牧以報東門之役。衛人以燕師伐鄭。鄭祭足原繁洩駕。以

三軍軍其前。使曼伯與子元潛軍軍其後。燕人畏鄭三軍。而不虞制人。六月。鄭二公子以制人敗燕師于北制。君子曰。不備不虞。不可以師。○曲沃叛王。秋。王命虢公伐曲沃。而立哀侯于翼。

**秋。衛師入郟。**

郟音成。公作盛。

左傳衛之亂也。郟人侵衛。故衛師入郟。公羊傳曷為或言率師。或不言率師。將尊師衆稱其率師。將尊師少稱將。將卑師衆稱師。將卑師少稱人。君將不言率師。書其重者也。穀梁傳入者。內弗受也。郟國也。將卑師衆曰師。

**胡傳**

稱師者。紀其用衆。而立義不同。有矜其盛。而稱師者。如齊師宋師曹師城邢之類是也。有著其暴。而稱師者。楚滅陳蔡。公子棄疾主兵。而曰楚師之類是也。有惡其無名。不義而稱師者。次于郎。以俟陳蔡。及齊圍郟之類是也。衛宣繼州吁暴亂之後。不施德政。固本恤民。而毒衆臨戎。入人之國。失君道矣。書衛師入郟。著其暴也。

**九月考仲子之宮**

公羊傳考宮者何。考猶入室也。始祭仲子也。桓未君。則曷為祭仲子。隱為桓立。故為桓祭其母也。然則何言爾。成公意也。穀梁傳考者何也。考者成之也。成之為夫人也。禮。庶子為君。為其母築宮。使公子主其祭也。於子祭。於孫止。仲子者。惠公之母。隱孫而脩之。非隱也。



**胡傳**

考者始成而祀也。其稱仲子者，惠公欲以愛妾為夫人，隱公欲以庶弟為嫡子。聖人以為諸侯不再娶，於禮無二適。孟子入惠公之廟，仲子無祭享之所，為別立宮以祀之。非禮也，故因其來而正名之，曰仲子之廟。因其考宮而正名之，曰仲子之宮。而夫人眾妾之分定矣。隱公攝讓之實辨矣。桓公篡弑之罪昭矣。存則以氏繫姓，以姓繫號，歿則以謚繫號。單舉姓字者，妾也。凡宮廟非志災失禮，則不書。

**初獻六羽**

左傳九月，考仲子之宮，將萬焉。公問羽數於衆仲，對曰：天子用八，諸侯用六，大夫四，士二。夫舞所以節八音而行八風，故自八以下，公從之。於是初獻六羽，始用六佾也。

公羊傳初者何，始也。六羽者何，舞也。初獻六羽，何以書，譏何，譏爾，譏始僭諸公也。六羽之為僭，奈何，天子八佾，諸公六，諸侯四，諸公者何，諸侯者何，天子三公稱公，王者之後稱公，其餘大國稱侯，小國稱伯，子男，天子三公者何，天子之相也，天子之相，則何以三，自陝而東者，周公主之，自陝而西者，召公主之一，相處乎內，始僭諸公，昉於此乎，前此矣，前此則曷為始乎此，僭諸公，猶可言也，僭天子不可言也。

穀梁傳初，始也。穀梁子曰：舞，夏天子八佾，諸公六佾，諸侯四佾，初獻六羽，始僭樂矣。尸子曰：舞，夏自天子至諸侯皆用八佾，初獻六羽，始厲樂矣。

**胡傳**曰：羽者，佾也。初獻六羽者，始用六佾也。不謂之佾而謂之羽，而曰佾也，初者，事之始，魯僭天子之

干以象武功，婦人無武事，則獨奏文樂，故謂之羽，而曰佾也。初者，事之始，魯僭天子之

干以象武功，婦人無武事，則獨奏文樂，故謂之羽，而曰佾也。初者，事之始，魯僭天子之



禮樂舊矣。是成王過賜而伯禽受之非也。用於犬廟以祀周公。已為非禮。其後羣公皆僭用焉。仲子以別宮。故不敢同羣廟而降用六羽。書初獻者。明前此用八之僭也。諸侯僭於上。大夫僭於下。故其末流。季氏八佾舞於庭。而三家者以雍徹。上下無復辨矣。聖人因事而書。所以正天下之大典。

### 邾人鄭人伐宋

左傳宋人取邾田。邾人告于鄭曰。請君釋憾於宋。敝邑為道。鄭人以王師會之。伐宋入其郭。以報東門之役。宋人使來告命。公聞其入郭也。將救之。問於使者曰。師何及。對曰。宋及國。公怒。乃止。辭使者曰。君命寡人。同恤社稷之難。今問諸使者曰。師未及國。非寡人之所敢知也。

### 胡傳

按左氏宋人取邾田。邾人告于鄭曰。請君釋憾於宋。敝邑為道。則主兵者邾也。故雖附庸小國。而序乎鄭之上。凡班序上下。以國之大小。從禮之常也。而盟會征伐。以主者先。囚事之變也。然則衛州吁告於宋。以伐鄭事。與此同。而聖人以宋為主者。何。此春秋撥亂之大法也。凡諺亂臣討賊子。必深絕其黨。

### 螟

音冥。○蟲。災始此。

公羊傳螟何以書。記災也。穀梁傳螟。蟲災也。甚則月。不甚則時。

### 胡傳

蟲食苗心曰螟。食葉曰螽。食節曰賊。食根曰蠹。國以民為本。民以食為天。詩去螟。螽。害稼也。春秋書螟。記災也。聖人以是為國之大事也。故書。而近世王安石乃稱為人牧者。不必論奏災傷之事。亦獨何哉。甚矣其不講於聖人之經。以欺當年。而誤天下與來。



世也

冬十有二月辛巳公子驅

苦侯反卒

左傳臧僖伯卒。公曰。叔父有憾於寡人。寡人不敢忘。葬之加一等。

穀梁傳隱不爵命大夫。其曰公子驅。何也。先君之大夫也。

**胡傳**

按左氏。臧僖伯卒。公曰。叔父有憾於寡人。寡人不敢忘。葬之加一等。以公羊三世考之。則所傳聞之世也。而書曰。見恩禮之厚明矣。公將如棠觀魚者。僖伯諫而不聽。則稱疾不從。可謂忠臣矣。葬之加一等。夫是之謂稱。然隱公不敢忘其忠而不能聽其言。與郭公善善而不能用於亡國。一也。其及宜矣。

宋人伐鄭圍長葛

此書圍之始

左傳以報入郟之役也。

公羊傳邑不言圍。此其言圍何。疆也。

穀梁傳伐國不言圍邑。此其言圍何也。久之也。伐不踰時。戰不逐奔。誅不填服。苞人民。毆牛馬。曰侵。斬樹木。壞宮室。曰伐。

**胡傳**

圍者。縲其城邑。絕其往來之使。禁其樵采之途。城守不下。至於經年而不解。誅亂臣。討賊子。可也。長葛。鄭邑。何罪乎。書圍於此。而書取於後。宋人之惡彰矣。

子桓王六年

齊僖十四。晉哀侯光元年。衛宣二十三年。秦文四十九。楚武二十四。宋

春鄭人來輸平

輪左作淪

左傳更成也。公羊傳。輸平者何。輸平猶墮成也。何言乎墮

春秋左傳

卷二

七



成敗其成也。曰吾成敗矣。吾與鄭人未有成也。吾與鄭人則曷為未有成。狐壤之戰。隱公獲焉。然則何以不言戰。諱獲也。穀梁傳。輸者墮也。平之為言。以道成也。來輸平者。不果成也。

**胡傳** 輸者納也。平者成也。鄭人曷為納成於魯。以利相結。解怨釋仇。離宋魯之黨也。公之未立。與鄭人戰于狐壤。止焉。元年及宋盟于宿。四年遇于清。其秋會師伐鄭。即宋魯為黨。與鄭有舊怨。明矣。五年鄭人伐宋。入其郛。宋來告命。魯欲救之。使者失辭。公怒而止。其冬宋人伐鄭。圍長葛。鄭伯知其適有用。聞可乘之隙也。是以來納成耳。然則善之乎。曰。平者。解怨釋仇。因所善也。輸平者。以利相結。則取矣。曷為知其相結之。以利也。後此鄭伯使宛來歸。而魯入其地。會鄭人伐宋。得郛及防。而魯又取其二邑。是知輸平者。以利相

結。乃貶之也。諸侯脩睦。以蕃王室。所主者義爾。苟為以利。使為人臣者懷利。以事其君。為人子者懷利。以事其父。為人弟者懷利。以事其兄。諸侯必曰。何以利吾國。大夫必曰。何以利吾家。士庶人必曰。何以利吾身。上下交征利。不至於篡弑奪攘。則不厭矣。故特稱輸平。以明有國者。必正其義。不謀其利。杜亡國敗家之本也。

**附錄** 左傳翼九宗五正。頃父之子嘉父。逆晉侯于隨。納諸鄂。晉人謂之鄂侯。

夏五月辛酉公會齊侯盟于艾。艾五蓋反。○此齊魯交好之始。

左傳夏盟于艾。始平于齊也。

**附錄** 左傳五月庚申。鄭伯侵陳。大獲。往歲鄭善鄰國之實也。君其許鄭。陳侯曰。宋衛實難。鄭何能為。遂不許。君子曰。善不可失。惡不可



長其陳桓公之謂乎。長惡不悛。從自及也。雖欲救之。其將能乎。商書曰。惡之易也。如火之燎于原。不可嚮邇。其猶可撲滅。周任有言曰。為國家者。見惡如農夫之務去草焉。芟夷蘊崇之。絕其本根。勿使能殖。則善者信矣。

### 秋七月

公羊傳此無事何以書。春秋雖無事。首時過則書。首時過則何以書。春秋編年。四時具。然後為年。

**胡傳** 四德備而後為乾。故易曰乾元亨利貞。一德不備。則乾道熄矣。四時具而後成歲。故春秋雖無事。首時過則書。一時不具。則歲功虧矣。既書時。又書月者。時。天時也。月。主月也。書時又書月。見天人之理合也。易不云乎。君子行此四德者。故曰乾元亨利貞。若夫

上下異致。天人殊觀。聖學不傳。而春秋之義隱矣。

### 冬宋人取長葛

左傳作秋

公羊傳外取邑不書。此何以書。久也。穀梁傳外取邑不志。此其志何。久之也。

**胡傳** 宋人恃強圍邑。久役大眾。取非所有。其罪著矣。在王。朝不能施九伐之威。在列國不能脩連帥之職。鄭人土地。天子所命。先祖所受。不能保有而失之。是上無天王。下無方伯。而鄭亦無君也。宋人強取。以王法言。不可勝誅。以天理言。不善之積著矣。初穆公屬國於與夷。使其子馮出居於鄭。殤公既立。忌馮而伐鄭。不亦逆天理乎。春秋序宋主兵。以殤公之罪重也。明年鄭人伐宋。序邾為首。以鄭伯之罪輕也。至是宋又舉兵伐鄭。而圍其邑。肆行暴虐。不善之積已著。而不可解矣。其見弑於亂臣。豈一朝一夕之故哉。凡此類皆



直書于策。按其行事而善惡之。應可考。而知天理之不誣者也。

**附錄**

左傳。冬。京師來告饑。公為之謂。羅于宋。衛齊鄭禮也。○鄭伯如周。始朝桓王也。

王不禮焉。周桓公言於王曰。我周之東遷。晉鄭焉依。善鄭以勸來者。猶懼不蕲。況不禮焉。

鄭不來矣。

春秋四傳卷二

Handwritten signature or mark at the bottom left of the page.



